

程侍郎遺集

一





程侍郎遺集

(一)

J  
17.8  
1  
1.22/2

程恩澤撰

# 程春海先生集序

嘉慶九年。先生年二十。來鄉試江寧。始相見。讀其詠史詩若干首。先君子呼曾亮曰。汝見程公子詩乎。渠長汝者一歲耳。及道光十一年。先生來主講鍾山書院。相見益親。夜過其邢氏寓園。月出園中。竹石如沐。池光盪人。面坐水檻中。盡讀其所作於別後者。而幼聞得名以黃蝶詩及前見者。俱不復存矣。是時總督陶文毅公。政寬簡。民吏樂逸。多興復湖山寺觀。而葆益舟觀察尤好爲主人。泛酒船至燕子磯。飲絕壁下。還過嘉善石壁。訪梅花。水夾蘿峯。飯半山亭。聽銅溝水聲。循定林寺古道歸。以爲常。先生及曾亮數人。皆其座中客也。復至京師。爲先生戶部屬官。遇我一如其舊。山館野寺。未嘗不偕。偶召賓。未嘗不與也。有所作必見示。時命同作。然常十不副一。而先生則於詞無所窮。其稱情輔意。足以射聲叩景。如高贊者。無所志而不就也。丁酉夏。忽見語曰。吾庭中樹鴉數百。夜噪而飛。拔巢去。此何祥也。未幾而病。呼余與訣。余雖悲。猶以爲倘不至若是。後十餘日。竟卒。自先生去江寧。其同游者。任階平。王竹嶼。汪均之。皆已死。而觀察亦歸殯京師。羣駟馬之墓側。先生往哭甚哀。及余與徐蓮峯哭先生。去哭觀察時。未三四年。今蓮峯又亦久死。先生之卒。已十年矣。悲夫。戶部尙書祁公。以其孫幼孤。遺集或散佚。屬張石州大令編而校之。曾亮不可無一言綴於末也。先生平居。無時去書。其學實事求是。而能創獲新義。阮相國。何子貞。編修。及石州。已詳言之。故惟述少長離合。南北游處之歡。以見略勢分而篤古誼。如先生者。殆不可多見。以誌吾哀。至

所作深博雄偉。讀者當自得之。非言詞所能贊也。雖然。先生之異乎流俗者。豈獨其詩文哉。人嘗屬會亮  
以事而匿其情。漫爲請於先生。覆書曰。吾子而有是言。豈某生平有不見信於深友者乎。不然。則子受給  
也。其行已情深而義方。雖他事類如此。傳曰。直諒多聞。古之益友。又曰。夫惟大雅。卓爾不羣。先生殆無愧  
斯言夫。殆無愧斯言夫。道光二十六年六月。上元梅曾亮譔。

# 程侍郎遺集初編序

先大父宰歙。徧交其邑之名儒。而戶部侍郎春海程公之考。蘭翹學士。以僮子從父後。肄業斗山亭。特爲大父賞拔。學士家極寒。大父召入署。躬督教之。衣食視諸子。不數年。諸經注疏皆精熟。爲文瀟辟精粹。試必冠曹。舉乾隆丁酉拔貢。入成均。連掇巍科。儼直內廷。聲望斐然。顧艱於嗣。晚乃誕公。公丰儀玉暎。父母珍若連城。七歲就傅。每日讀書。不過二時。而寒燠晦霾。氣候失和。皆輟課。曹顧厓少宰。大父庚寅分校南闈。所得士也。時官侍講。先君子從之遊。與學士同邸。每抱持公。問以書。不能答。則徧檢輿僻不經之字。相詰難。蓋好奇不羣。幼性爾也。比學士卒於山東。學政任所。高宗純皇帝特簡歙人之官清要者。俾往經紀其喪。因以少宰嗣司校事。少宰延先君子同往。至則爲庀其行篋。握公手。送之登車。年十有一矣。已而先君子會試入都。見學士舊僕。訊以門戶近況。則言公子發憤力學。入邑庠。大被宗師賞異。出應試。小賦名雋。綺麗。歎爲絕倫。逮乙丑。再赴禮部試。公亦偕計吏來京師。風雅淹博。輦下共推爲才子。又越七年。遂與先君子同舉進士。入翰林。公嘗贈穆詩曰。君祖授我嚴。獎誨若子姓。君嚴我同譜。欣契挫其敬。蓋實錄云。公負奇氣。博觀強誦。於經訓。史策。天象。地輿。金石。書畫。壬遁。太乙。脈經。格學。莫不窮極要眇。究析發皇之。而精神所到。卓絕岸異。必然可傳於後者。則其有韻詩文也。詩。初好溫李。年長學厚。則昌黎山谷。兼有其勝。又際會清宴。無金革流離之事。傷其耳目。故形之篇詠者。率排稟妥帖。力健聲宏。琅琅乎若鸞鳳之嘯。

於穹霄也。穆於癸巳之春。初侍公直園。情好之洽。久愈摯。不三五日。必召過飲。投巾振袂。談議交錯。寒士之被禮者。殆無與比。嘗請公自訂其詩。公曰。吾詩險而未夷。能飛揚而不能黯淡。思力所及者。腕每苦其不隨。更讀書十年。殆可相質邪。嗚呼。執意所業之遂止於斯歟。丁酉夏。穆將歸應鄉試。行有日矣。公置酒相餞。漏過午。拳拳不放別。乃穆甫出都門。公遽感暑疾。久不瘳。祁淳父尙書日往省之。沈頓之頃。尙以穆試事爲念。遺言乞儀徵相國銘其墓。而尙書書之。次年。穆將南游。迂道入京師。哭公。公子德威以遺稿相授。塗乙潦艸。首尾多不完。或篇題殘挽。乙酉以前之作。竟無一字存。疑公尙有清本。藏之別笥。德威未檢獲也。謀更事。搜采成完帙。荏苒未遑。而德威又以措交庫款赴粵東。卒於劉仲寅觀察署中。觀察名景昌。公視學貴州所拔貢生。公歿後。所以賙恤其家者有加。德威卒。命其弟送柩返歛。買山營壙。并葬公及金夫人兩世三棺。其孤孫嫠婦之寄寓京師者。則祁尙書爲經營擁樹之。觀察又議以幼女妻德威之子。而娶其女爲己子婦。迎公全家入黔。相依以久。嗚呼。師恩友誼。人有同情。當公賓客填咽之時。詎知身後巨卿。乃此兩人哉。穆幼聞先君子之所以稱公者長。而公之相待。略如大父之待其先德。知己之感。永永弗諼也。今年春。尙書謀刻其遺集。曰。以此爲初編。續有哀錄。補梓易耳。穆旣恐殘斷之稿。并歸藎落。又懲夫嫁名僞譏者之厚誣公也。乃偕公門人何編修紹基。排比爲賦一卷。詩四卷。又凡稿艸之失題者。及詩餘試帖。共爲一卷。碑志哀誄。駢儷雜著之文。五卷。總題曰程侍郎遺集。而敘其緣起如此。以酬公知。兼志余痛云。道光二十有五年。端蒙大荒落。三月旣望。平定張穆序。


# 誥授榮祿大夫戶部右侍郎兼管錢法堂事務春海程公墓志銘

公諱恩澤。字雲芬。號春海。程氏東晉時有爲新安太守者。居篁墩。又遷歙南。代有隱德。曾祖筠。祖步矩。郡生員。父昌期。乾隆庚子進士。第三人及第。上書房行走。翰林院侍講學士。母項氏。總兵樛木女。公幼穎異。數齒經傳。皆成誦。尤好讀古書。遇疑意。必考問釋然而後快。鄉先達曹文敏公。金輔之先生。皆語學士曰。此子逾冠。所學不可量矣。乾隆六十年。學士卒於山東學政任。公甫十一歲。哀毀力學。及長。補學生員。益博綜經史。從外祖學騎射。能挽強弓。最後乃從凌仲子先生遊。及其闔奧。先生曰。天人並至。博而能精。將來所成者大也。嘉慶甲子鄉試中式。舉人居京師。益勤於學。天算地志六書訓詁金石。皆精究之。辛未會試中式。殿試二甲。改翰林院庶吉士。散館授編修。道光元年。命在南書房行走。召諭曰。汝父蘭翹先生品學。朕昔年最敬。汝之聲名。朕亦皆知。宜更守素行。今戶部侍郎祁公鶴藻同召見。親聆聖訓。出語同朝。皆榮之。旋奉敕校刻養正書屋集。是年充四川正主考。二年。補春坊中允。校刻御製詩文初集。三年。放貴州學政。補翰林院侍講。轉侍讀。五年。補春坊右庶子。冬。補侍講學士。次年。調湖南學政。回京。詔充春秋左傳纂修官。補國子監祭酒。九年。項太夫人卒。丁憂歸歙。十一年。起服入京。仍在南書房行走。十二年。以候補祭酒。未與考差。特放廣東正主考。十二月。命在上書房行走。課惠親王學。王敬禮師傅。出于至誠。講學爲詩古文書法。皆日有進。甚相益。上與王論公爲人。有和而不同之目。十三年。超擢內閣學士兼禮部侍郎。

冬。充文淵閣直閣事。十四年。授工部右侍郎兼管錢法堂。十五年。會試知貢舉。調戶部右侍郎管錢法堂。充殿試讀卷官。閏六月。諭程恩澤部務較繁。著無庸在上書房行走。十六年。復充殿試讀卷官。十七年。充經筵講官。夏。受暑。醫逾月。病愈深。遽以七月二十九日卒。明日。遺疏入。上嗟嘆悼惜久之。諭曰。程恩澤由翰林洊升卿貳。前在南書房上書房行走。有年。人甚謹飭。辦理部務。克盡厥職。近因感受暑溼。賞假調理。方冀速就痊癒。益資委任。茲聞溘逝。殊堪軫惜。伊子程德威。著加恩賞給舉人。服闋後。准其一體會試。公學識超於時俗。六藝九流。皆好學深思。心知其意。本工篆法。益熟精漢許氏文字之學。官貴州學政時。與布政司吳榮光。勸士民育粟蠶。其利大行於民。又重刻岳珂五經以訓士。及奉詔刻春秋左氏傳。與祁公共議。推本賈服。不專守杜氏一家之學。平日好士。說士技若己有。典試廣東。期取實學之士。知曾釗之名。必欲得之。釗久丁憂。公不知也。書榜大失望。然所得佳士亦甚多。出闈後。與學海堂學長吳蘭修等遊白雲山。名士會者數十人。有蒲澗賞秋之圖。所著述惟國策地名考二十卷。已寫定本。其餘多未成書。實不自料其遽折。詩文雄深博雅。稿亦盈篋。其孤方治喪。待錄成卷帙。就有學者擇之。當成佳集。公又多藏書。宋元以來。子史雜錄。博覽強記。金石書畫。亦多考訂。苟有叩者。必舉以應。元入京。與公居相近。尚以暇相講習。元偶校毛詩。有椒其馨。椒字詵。本是馥字。其詵久在六朝。罕可相語者。持以示公。公獨深會其意。謂詩苾芬孝祀。韓詩作馥。芬孝祀。馥字毛韓兩見。形聲不謬於六書。爲加一證。公又謂近人治算。由九章以通四元。可謂發明絕學。而儀器則罕有傳者。乃與鄭君復光。有修復古儀器之約。又嘗深究開元占經。謂



道光十五年木火同度。當有火災。人驗其言而趨之。吉地案發。因水之故。曹文正問公。古有之乎。公曰。水  
齧王季墓。見棺之前。和呂覽載其事。所撰國策地名考。如謂孟津在河北。非今孟津縣。亦非古河陽縣。蒲  
反非舜都。乃衛蒲邑。以嘗入秦。仍歸。故謂之蒲反。諸條皆確不可易。公之歿也。年僅五十有三。朝野皆悼  
惜之。金夫人以道光元年卒。二年。繼娶劉夫人。孫一名新寵。公於元例稱門人。且仲子先生爲吾友。學術  
相契。因爲之志銘曰。公之爲人。和而不同。厓岸內峻。德氣外沖。兩世內廷。在位靖共。聲名品學。守之惟公。  
公學之大。啓於凌氏。約禮博文。實事求是。研究經義。及於子史。卽以其學。望之於士。嗚呼。天命。限公不祿。  
帝諭飾終。賞延世篤。遺書未定。集之可讀。我鐫此銘。永貞宰木。



# 程侍郎遺集初編卷一

## 柎賦并序

激懷園食筍齋後土阜有嘉樹三居者過者皆罔識其名予初亦嘗焉繼綜其華實枝葉審諦之定爲北山之柎按柎兩見詩一見周禮一見爾雅屢見山海經詩毛傳云柎櫪也卽用爾雅文疏云葉似杏而尖白色皮正赤按木皮少正赤者恐是子正赤之訛爲木多曲少直枝葉茂好二月中葉疏華如棟而細蕊正白正名曰萬歲或謂之牛筋或謂之櫪材可爲弓弩幹也郭注雅云似棗細葉材中車輞關西呼柎子一名土樞其注山海經從同同說文作櫪別有櫪乃櫪也三輔黃圖曰柎詣晉宮闕名曰萬年樹太平御覽同皆柎也而本草經及李氏綱目不載豈以其非藥味歟廣雅埤雅爾雅翼亦不載審此柎非難識之物自三代以來書屢見則無古今之異西都南都皆賦之則無南北之殊然自宋以後著錄漸少豈非顯隱有時人與物忽不相值耶遂作賦曰

有物於此蔭於堂背其枝羽喬而句其榮鈇析以碎曼理文身若錯繪綺而被繪畫也子有稜而方一裹一縣四核一房生青纒纒孰赤煌煌將零坼苞若蓋重囊臣愚不識敢詢圃場或僂言於側曰此夫鷲侶棟而素織者歟葉侶杏而益鐵者歟萬歲之名聞者頌者所意忭者歟共汲之山華林之園柎詣之宮周秦漢以來所具瞻者歟或揉車輞致遠而利往或奠弓幹揚武而捍患有虬其條琅然振風有情其景月

宵瓏瓏。譽一世而眇知。則不相尋於斧鋨外。多曲而委蛇。棍剛柔而積中。願託根於魁父之邱。願指名之  
洵洵。故夫梓以爲羣。棣以爲友。糧以爲偶。聞諸北山樵者之口。夫是之謂柎也。

南邨耦耕圖賦并序

鄧子湘皋。與其兄子振顯鵠齊名。友愛至篤。子振不欲其弟爲知縣。畫聽雨圖以寄。蓋取坡公慎勿苦戀  
高官職詩意。湘皋亦作耦耕圖以見志。乃爲賦之。其詞曰。

客飢阻以旅饗兮。干通侯而東南。瞻污萊而不歸兮。又輟道乎長安。資姬髡而索納兮。還髡徒而阻之。思  
孟晉以迨羣兮。或差誰而取之。出卽脫乎簿尉兮。又奚棄乎令長。視己事以志墨兮。定物遂而民向。文豹  
欲潔其羽毛兮。宜鶴亦厲其高響。安能以身之察察兮。試紫水之滄泱。惆悵而私自憐兮。委銀艾若泥塗。  
吾將老於耕垆兮。吾將息乎詩書。矧吾仲之清羸兮。託長鑱以爲命。考豐年之瓦盆兮。有倡于而無和聽。  
天屬旣畀予有兄兮。獨奈何其舍旃。前曜靈已虛擲兮。後俄景其益遄。累別緒而成疾兮。況家紛之世離。  
予不從仲以歌舞兮。仲日邁其難支。朝三圭而夕萬鍾兮。予不以易此耽樂也。丹吾穀而覆公餗兮。予又  
安知其以市惡也。莽無垠兮。天宇倏駕鷲兮。來下。仲有書兮。促歸。感淮雨兮。資之澣。圖蒼茫兮。雨浪浪。書  
不盡言兮。圖之詳。季發絨以嗚嘯兮。探予心而鑄辭。緬舊盟於合耜兮。夢已接乎東菑。乞丹青以抒懷兮。  
聚伯亞於冷風之圻。仲發絨亦嘗嗚嘯兮。胡與予心若相期。系曰。季才俊兮。迺慎進兮。仲知命兮。季益信  
兮。返井通兮。耦兩翁兮。在南邨之宮兮。

應制元夕觀鏡賦

皇上御宇之三年。乘震執規。以順陽和。大舉禮樂之盛儀。凡所以聯上下之意。協臣民之慶。莫不賅備。而元夕設鏡樹。陳百戲。焜燿於禁禦。得與觀者。尤所榮幸。小臣囊筆侍從。銜恩飲膏。日浹月深。茲復趨陪於圭組金紫之采。延頸跂踵。快心眙目。沃穆歡咳。不知所云。承命授簡。用賦斯事。小文末學。無以闡述。惟就賓主問答之辭。以張中外同樂隆平邛治之景象云爾。謹拜手稽首賦曰。

擊壤老人。曝榮而嬰。撫塵而遊。方春令節。上元將娛。乎駢生之肆。與冠蓋之州。觀金支之華秀。覽百戲之夥。適敏於青藜丈人曰。恭聞聖天子。牟盧六合。徵召五隄。新政新命。照灼丹辰。兵銷穀殖。海鏡河軌。民氣衍衍。萬方送喜。於時青陽告辰。鶴雲東行。萃九宇之樂思。以譜乎陽伯大謠之樂聲。東市有銀花之樹。西市有金羊之鏡。南市有攢星之樓。北市有結綺之棚。火戲電礮。飛爆雷騰。拖鈎拔河。尋橦走繩。魚龍曼延。雲霞蔚蒸。爾乃明月照夜。助以白雪。士女炫服。錦車塗鱗。標爛琳圃。出入金穴。齧鬢黃髮。踏歌弭節。跡才踵乎閭卷。心又馳乎觀闕。聞竹肉而竟逐。還燭龍而中輟。晶爇木其遞耀。鑿秋毫而未徹。故夫周處風土之記。宗懷歲時之書。綵山珠幕之麗。芳苴蒲桃之殊。莫不窮瑰瑋之極形。通數宵而畢臚。子大夫照晷之暇。盍往觀乎。青藜丈人乃盱衡而荅曰。上元然鏡。權輿於太乙神祠。僕相羊於叶蟄倉杲。掩層霄而上之。嘗以上元之夕。獨涉乎石渠天祿。見長樂之繁富。殊人世之軌躅。子徒胸轉於銅駝金市。而未攀躋夫駁娑宣曲也。方今聖天子坐乎璇題玉英之宮。召翼宿使舉樂。驅鶉囀而命黎融。盛羽衛之上儀。聚五色


而宜八風。陽景西匿。光在鐙樹。彩游表道。繡屬雲布。擊場空寬。橫以桂栝。於是三河健兒。脈勇氣怡。噉拳  
卞戲。觥頂交頤。乳贖門酣。威讐老罷。秋千高踞。竝歌齊俯。人方角技。彼且笑語。樂聲唼囉。來自朱波。佞童  
冶謠。作態娵嬰。印度二八。繡襦持斧。同工異曲。俱解羽舞。劉吃施努。俛翻反據。兩兩拍張。連臂若狙。立駿  
馬於明駝。效解數而跳踉。走巨綆而燕輕。試木熙而上翔。紛字舞之陸離。排絳紗而耀光。班文駕以相顧。  
列翡翠而重行。爰乃暮譙。彌望圓蟾。欲湧列炬。娛夕枿櫨。峻聳棍匱。匝以方圓。藏頃刻之奇花。昂龍首以  
領珠。散雉尾而成霞。神絲千純。芝蓋九葩。焮芙蓉於掌中。倒珊瑚而槎枒。或粲粲若飛星。或熠熠若金蛇。  
或纍纍若編珠。或零零若翦紗。或慘懽若落英。或傑儼若繫瓜。或闕戶而下虹。或貫月而成槎。絲管并舉。  
細音穆羽。閒以鹽散。節以鍾呂。火鳳來下。頰蚪對處。旣蒼萃而成劇。倏驚人以風雨。列歎迅走。如矢脫絃。  
萬雷動地。萬鏡飛天。萬燧繞林。萬燭照田。赤埃之氣。蒸於赤泉。黝黝沉沉。鬱爲祥烟。乃復珍臺別館。華炬  
載更。法駕移蹕。丹天炳明。蛻膏瀾翻。蜃液激清。惟上穹之需雲。隨所遇而象呈。若僕所言。十分而未得其  
一端。目可治而口不能名也。且夫有淳耀惇大之德。以出納夫火政。而節宣其赫曦。於是乎無災燿之虞。  
得改燧之宜。陳火戲之義。蓋在斯也。我國家置宇開拓。伊古無偶。於是乎具羌歌與蠻舞。提鷄婁而曳鳳  
首。示甌脫之雁臣。俾奔走而恐後。我國家大武三曾。人習擊刺。於是乎寓兵機於蹙鞠。程勇力而相試。嘆  
干城之足用。鑿綺帛而寵賜。又況豐年穰穰。紅粟盈倉。天子儉德素風。捐珠犀而抵琳琅。惟欲洽文母之  
歡心。乃怡豫而愷康。澤四海以蓼蕭。錫臣鄰以筐篚。於是乎值傳柑之嘉時。進露抃於臨光也。青藜丈人。

陳說未畢。擊壤老人。乃翹首而頌曰。侯其禕哉。當堯舜之時。日月光華。星辰爛陳。紉縵卿雲。或或闕闕。持以喻禁苑之景光。與不夜之良辰。洵異代而同春也。夸於市人。異見異聞。相與婆娑乎九衢。不知東方之既昕。

山梔花圖賦

恩福堂師園中梔子花夏曠未放。經秋涉冬。花盛繁。師有句。命澤同作。因賦。

雪姢姢兮。六出蘆薹。支掩其嬌兮。於山之隅。其心孔艷兮。其房則孤。苑兮斂兮。夏冉冉兮。兩架歉兮。長顛領兮。嶠兮體兮。蕊稽藹兮。秋增枚兮。冬茂菱兮。唯有美之當階。與衆卉而異芬。塊獨得其清逸兮。通甞伽之遠聞。犯嚴威而弗瘵傷兮。豈恃幕帟之輪困。樹本既其厚兮。雖欲儻而彌新。諒不棄遺於君子兮。惜堂堂之芳晨。際搖落而采擇兮。懼韶穠之就湮。亂曰。心同而面殊兮。知臭味之無差池。詠風露而未央兮。將貽夫予所思。





# 程侍郎遺集初編卷二

詩

橡繭十詠并序

黔郡州十三。富郡二。曰黎平。曰遵義。黎平以木。遵義以繭。繭不以桑。以橡。然非初於遵義人也。乾隆間。守陳君實教之。於是食繭利。凡數十年。春秋繭成。歌舞祠陳君如生。道光三年冬。澤試遵義。旋過橡林。閒風策策然。葉鱗鱗然。記所歷郡。皆有橡。不以繭。今過平越都勻。土益沃。宜橡。因嘆曰。處處有橡。處處可繭也。富獨遵義乎。過鎮遠。見方伯吳荷屋先生。廉訪宋仁圃先生。頒令甲勸民種橡。詞懇懇。著街亭。時夕陽爛如。駐馬讀之。過思南。選校官某。韓劄出。則方伯廉訪督使巡上下游。購橡子。教播種。期三年成。食繭利。嗟乎。居尊官親民。爲謀百世利。思深哉。可謂君子儒矣。黔土瘠。黔民勞。勞無所獲。遂積廢不自振。曉之曰。利在某。不信。視某地民。遽然顧牆角。畦稜有美蔭。皆金錢。其黠者。慮利與害俱。且權之。曉之曰。有百世利。無一日稅也。則又慮購繭器織具紛然。費未入。先貸。曉之曰。如購種法。皆官爲。夫民。驕子弟也。官慈父母也。驕乃惰。慈乃周。以周起惰。惰乃勉。皆可學而能也。數歲利必若遵義。富甲西南維矣。澤職在文字。詠歌之可乎。分題十。各繫四十言。附長篇一。則舊冬作也。道光四年秋九月上游。貴州督學使者程恩澤撰。

種樹

橡隨在可植。三年枝葉蔚。可飼蠶。飼後休一年。老則充薪炭。新肄出。仍飼蠶。

種樹三年成。三年莫嫌遲。今日一丸泥。它日千絢絲。將絲比薪炭。何啻萬倍爲。黃金在枝頭。巧者能取之。

窠繭

以線貫秋繭。懸密室。溫以火。蛾出配乃孕。不斷火。子易出。

窠繭如窠花。蛹臥小天裏。不知春風來。但覺臥欲起。雄雌皆蛾眉。生子眇難視。一朝能上高。萬緒從此始。

春放蠶

子既出。承以橡枝葉於筐。能自上。即取枝葉縛之樹。

越蠶急蠶食。意欲親乳哺。黔孃忘蠶功。一任飽風露。得繭大於壺。不顧越孃妒。回頭笑嫺婦。歌舞博執素。

秋放蠶

春繭就暖。蛾自出配。乃孕。以絲兩頭繫兩蛾。巨橡樹閒。即育子。著枝葉。

秋蛾似胡蝶。置之高樹巔。一繩繫兩雌。其情不相連。出殼葉漠漠。曼絲頭娟娟。當其未成時。晝夜防未然。

毆蠹

害蠹者。鳥也。蠹也。春秋之晝須毆鳥。秋夜須毆蠹。野蠹先於柘館。故古有爲蠹毆雀之官。

鳥曰子口甘。豈惜人之寒。鳥栖蠹又來。蠹乎良獨難。畏響毆以柝。避形毆以竿。持謝鳥與蠹。竝生天地閒。

移枝

葉盡蠶未飽。翦枝移之它。毋驚蠶。

葉葉敵如絡。蠶蠶饑不禁。翦枝縛它枝。移家綠雲深。聲若驟雨來。蕭蕭風一林。蠶孃未入山。常懷已饑心。

煮繭

繭成投熱湯。入收灰汁乃熟。乃纒之。蛹不能生也。或曰。蛹混沌無知。故昔人無揀蛹法。

功成赴湯火。幸在混沌時。繭剛可使柔。絲斷難重治。水涑渥以灰。古法存於斯。齊紈不十年。越羅風淒其。

上機

絲值蕙繭網值倍。絲功成矣。如績學然。

絲值蕙繭值。織成金滿屋。鎧火連晨晷。伊軋擾夜讀。上充公姥襦。下翦兒女服。衣郎郎不著。願換來春穀。

利無筭

橡可衣可食。地寶也。

橡粉可療饑。橡斗可染阜。老枝薪且炭。新肄復蠶飽。一物備衣食。地乃不愛寶。黔富甲天下。居者殊艸艸。

永不稅

民趨利避害。永不稅。乃可與圖始。

購種與教織。瑣瑣皆官貨。焉忍復征權。如父謀其兒。有衣耀寒暑。有金充棟楣。土沃民轉勞。民勞勞則思。

橡繭歌

遵義野蠶成繭。曰青桐繭。不知於古爲何樹也。癸未仲冬。行部過長林閒。葉焦繭割矣。掇其實。知爲樸斗。樸斗之子名橡。孫炎云。樸似樗。按樸與樗迥別。不得以爾雅之樗繭當之。因字曰橡繭。作

橡繭歌

冬十一月來播州。撲頭黃葉風颺颺。是何嘉卉繁且稠。云此可媿桑之柔。美蔭捲綠春油油。彌山彌澤彌甌窰。不煩山奴玉斧修。無事紅女青挂鉤。葉以爲箔枝爲幃。結莢承種懸曲樛。蠕蠕子子紛相蹂。天教寢食得自由。自起自眠登樹頭。暝日出曝雨則僂。蝕厥新甲棄厥廬。神叢打鼓小姑求。宛窳夫人跪樹歐。願生脂屬無生鳩。爲歐花豹歐栗鷁。竹桥行畫宵乃休。何如彩幡長其旂。娟娟風露春復秋。兩番割繭十倍收。繭熟圓如金彈投。蛾飛大與胡蝶伴。杼聲萬家絲萬抽。蠶孃樂逸機孃愁。蠶功逸流黃縑素充畫樓。可憐龍馬不上鞦。蠶與馬同宮其地乃封千戶侯。我來長林采其劉。知是樸斗其實楸。斗可染阜實可洩。高士拾之狙公留。不材之木值十牛。卻顧材木翻包羞。黔中土瘠民靡豚。何不廣植上下游。計其贏羨裨先疇。終歲乃無旱澇憂。有暉其道夏喝瘳。有依其士絲衣紉。積銖糸寸成長裘。衣被直徧西南陬。

北湖懷古

松桂林中讀書影。忽乘天風北度嶺。居柳乃見月三穀。聞道猶猿淚如綆。謂陽山之民李伯康至呼以博。張公子來擁其頸。北湖空闊雲破碎。十萬秋荷覆春荇。可憐壯齒三十八。照見平生已瘰瘡。時時縱酒助談詠。

往往篇章出俄頃。不知貶斥塞衢路。謂王任王叔文輩。但覺又魚滿筍簍。任文委瑣不足計。夢得將至連州境。欲

向同僚告目見。颯風掀屋盡聚皿。夢得之貶連州必過郴。時公在郴。小人竊柄此當議。大賢被逐何其猛。欲以目見告夢得。故永貞行云云。

豈真劉柳語有洩。故遣任文怒加咎。公之貶陽山或以為議任文之奸。而劉柳洩其語於任文。故怒而加貶。是時朝宰半庸妄。誰謂先生骨

獨顛。劉顛柳仆愧公直。公以直譴公則幸。長懷柳侯赴資邵。時子厚貶邵州。詎料劉郎過蘇井。論宮市與論苛斂。

當時外議殊不省。公貶陽山或以為論宮市或以為論。要之公心比赤日。千里墮地猶耿耿。彼婉變者奮。實斂大抵任文輩忌公。藉此為辭耳。

箕口使臺中評不得逞。不獨李實苦相厄。更遭使家抑不請。公教歸猶待命於。使家抑之也。憑愚大笑居士木。乞雨來

瞻女郎靚。有山奇變水清瀉。無乃天公界以靜。豈知它日更遠適。瘴海昏昏一舟梗。祇今湖水半枯涸。湖

鄰之北門外孔道旁。今化為田。遺竅猶傳在便屏。待郎竅在今永興縣。永興莽曰便屏。惜無專祠踞湖上。我來眺古歲在丙。炎風吹人不可

耐。快俯深澗酌秋冷。曾侯指我已瀟匯。時曾刺史銜就孔道旁。瀟水引泉築專祠其上。竝駕茆龍植桃杏。公神如水無不在。想見

波瀾與公永。休談二佛九僊地。恐公聞之駕以聘。

湘中兩番雪歌乙酉臘作

前日送客湘江頭。大窗西臨水陸洲。嶽麓之雲浩然起。混茫東去一千里。中有急雪萬銀鏃。一一射入碧  
波底。斯時曉色青朦朧。紅泥寺邊煙樹紅。綵旗遙遙逐行客。歸鞍載得十雙壁。昨宵寐中聞雨聲。瓦溝歷  
亂跳珠鳴。明鏡生暈鑪餒短。漸覺寒柝蹒跚行。北風撼園園折竹。曉來晴絮覆華屋。瘦桐小石無奇態。我  
欲衝寒訪湘曲。短衰雙漿噤不發。銅斗漁郎唱江淥。年來戒飲無酒夢。卻喜墨池澌不凍。肥羔烹後嚼雪

茶。陶黨無妨一筵共。荒齋土銜註爾雅。錦閣貂襜醉文鳳。人生何地不能樂。況乃千林散花淤。側聞西陲雪封山。又聞黃河冰塞關。津吏寥菱幾時歇。將軍懸甲猶未振。老農既歡土膏沃。安得新晴遣春晝。隆琴鼓中春可憐。階前已拆紅梅嫩。

次嚴麗生同年見贈元韻

楚甸風生軫。春城斗轉杓。青冥來一鶴。丹桂舊同僚。學拚紛綸井。文包邃雅姚。霜天五劍立。月蝟九霞燒。

異夢通輪廓。前身倚太霄。長楊空百賦。矮屋困三條。冑擲封侯筆。翻吹乞食簫。干戈淹蜀碧。君旅蜀久曾見教匪之變

風雨敵秦貂。易借將軍馬。難求博士軺。君平甘隱肆。高朕許聯鑣。君曾在蜀中主講顧我餐岷芋。無緣識孟椒。占

星當有郤。焚硯未逢苗。予使蜀時與君未相遇倏爾搏沙聚。欣然奉檄招。鹽車惜馭驥。瓦注辱盧梟。玉骨嶙峋龜。仙

髻颯爽飄。蓋傾無待熟。盡煖即相邀。話到壘門峻。重懷石棧遙。余入蜀出蜀皆由雲棧未經三峽故從君問壘門之勝登堂拜尊宿。

時廉訪公就養驚代讀風謠。首遇揚雲俯。情隨伯雪消。清奇偏嫵媚。高介轉和調。游獵談因管。崑崙墮為超。承明

棄嚴助。葉縣得王喬。下走儕幽介。中年感舊要。卷書頻旅館。聽鼓儼僧寮。客厭雙弓米。親馨數斗焦。黔湘

慚刻楮。寒暑倦乘躡。遂枉珠璣餉。如看虎豹跳。氣吞雲澤月。聲帶海門潮。君丹徒人欲覓彈冠友。先尋拔俗標。

引商難荅和。聃柱歎微么。

訂交詩贈鄧湘泉同年學博

同譜偶然耳。對面不相識。神交共千里。何況几席側。早春造我闈。秀眸映火色。警詞接軟語。握手出胸臆。

詩名三十載。山海溢殘墨。傾倒公諸侯。操卷面向北。如何賦窮鳥。屢鍛垂天翼。古有通榜法。原以網奇特。使君不奏牘。寸管孰華國。誰知高蹈心。兼不受吏職。苟有田可墾。亦弗首藉食。我聞師儒官。以道以賢得。士乃天下本。學用三代式。此地里屈宋。豈乏走籍湜。徒以利祿誘。詩禮亦作賊。壇宇倘能闢。來者踵相陟。我呼我友助。俯仰愧所植。我友昌於道。其道去華飾。詩文道之餘。實具龍象力。文得歐蘇正。詩欲杜韓逼。萬卷紛在眼。萬卷付銷蝕。何必擬前古。要自道悃悃。我意從同同。三歎轉默默。我別我友後。院鎖不踰闕。心知四山外。花鳥紅組織。我得我母書。慈體康且直。幸賴韓康藥。共戴陽慶德。且念遊子出。家人易惶惑。頻款北堂曲。告以頤養則。傾蓋如白首。此事已堪勒。矧更隆我母。此意尤悱惻。我將盟夫子。海枯石以泐。讀君詩若書。仰屋三歎息。我步嚴子韻。投足畏荆棘。君乃步我韻。雲棧失其仄。豈免過情譽。恐是相親亟。曾否過嚴子。風雨一鐙黑。曾否話行客。行客正遙憶。同心而離居。後會宜愛嗇。愛嗇君子交。毋使流俗測。

題湘皋哲兄雲渠茂才聽雨山房圖

有季有季阻京雒。欲往從之足力弱。鐙昏夜闌耿不寐。何當風苦雨又虐。一家氤氳尙岑寂。旅人傍徨何所託。遙知客去酒尊冷。獨立空階數寒柝。季抱雄心未甘老。思排青雲奮長鏢。公車不錄趙元叔。虛想承明備著作。州縣之役徒勞耳。不圖人縛適自縛。何如歸來翦明燭。臥誦新詩起行樂。百年奄忽有時盡。留此白首相盤錯。箕冠楯具不復御。收束黃鍾入趙鐸。賤貧尙恃支離篋。富貴先愁紇干雀。圖成寄季涕橫下。季曰進止仲引卻。引卻季進豈仲願。不能肥季使季削。誰知季心遠相印。已揣仲志守且恪。深惜軼轍

隔雲水。久慕沮溺耕荒莫。款門忽到天涯季。一笑西疇未渝約。長牀大被枕資眠。昨夜雨聲殊不惡。

張蓉裳學博三分水二分竹一分屋圖

蓉裳名家渠。貧無立錫焉。得此屋。蓋畫其意所欲也。

洞庭之水吞具區。瀟湘之竹天下無。牽船岸上卽爲屋。安用綠窗朱戶誇妍都。我來小舞揚其祛。但覺偏

抑瓜牛廬。甃盆作池砌種竹。何日一碧雲模湖。湖南提學署極小。頗思長沙地清絕。應有天上員莊居。長沙會中。竟無佳宅。

泮宮先生古林逋。宅不枕嶽當襟湖。豈知身外無一壺。虛想水竹斜川蘇。彈琴擢深醪。則愉吟詩肩聳口

則吐。巖壑不置謝幼輿。乃使闌干苜蓿連庭蕪。我欲謀之郡大夫。爲築回軒容釣徒。資邵之際多林於。間

有安樂行窩乎。時蓉裳任新化教諭。小園深裏匿市翠。明鏡曲照離樓梧。詩成琴罷酒百觚。風月與客爭清癯。何時

眼前突兀見此屋。再繪宏景移家圖。否乃往叩活溪吾。寥天一鶴猶可呼。一鶴謂湘皋也。時僕與湘皋有卜居活溪之想。

綠蘿巖丁亥春日作

玉人曉臨鏡。綰作墮馬髻。自顧一嫣然。光照姊與姊。名流醉敲帽。衣角飄風前。書味蝨胸中。俯仰皆可憐。

茲山勝以態。千古向人拜。不假草樹色。濃秀發天黛。回飈叩其腹。其響若鐘鼓。其腹疑有月。夜夜白如許。

桃花日暮天。祇愁化流煙。安得棹漁舟。守山長不眠。

桃源詩

避秦入洞壑。世世長子孫。如何唐畫詩。競指仙之人。避秦卽避宋。淵明寓言耳。如何武陵客。日尋壻口水。



或謂錯築城。投舂鍤者流。或謂罌拾棋。曾與仙子遊。漁父無姓氏。實以黃道真。劉歆非晉人。子驥豈前身。持以問淵明。不足當一哂。高臥北窗下。請從羲皇說。河汾至夸望。處處神仙家。三度過洞戶。今年逢桃花。桃花爛若錦。北風猛如虎。一飯不可留。耿耿憶前古。

桃源偶作

調朱注黛寫煙鬢。濃淚渲成石上斑。亦有形同吳寸趾。可憐愁煞豆青山。玉源三豎倚丹霞。賺得純郎啖落花。幸有南軒玉簫在。不教陳跡拾胡麻。栗里柴桑豈足耕。翻然欲作洞天行。僞書不顧淵明唾。太守漁郎補姓名。陶公不似謝公顛。遮莫來尋洞口煙。一樣桃花兩番雨。永初而後太元前。

澹巖

左揖元道州。右揖柳柳侯。茲巖者不得兩先生。姓字留。得無草木含泣泉石羞。兩先生者不得茲巖遊。得無神物闕惜慳其求。淺淺二詩老山谷。引出千詩鑿山綠。我尋黃九到石屋。雙戶豁然差遞而折旋。如入暗室。蕙蒼煙。忽規天光大其圓。若啓巨壺側以懸。人自壺中窺見天。壺口齒齒藤蔕牽。亦有烏道容攀緣。壺坐臥人百數千。迤其北西幽且偏。其勢總與天光聯。磊磊落落方圓反正凸凹百石友。各帶詩痕刻星斗。但能飲墨便嫵媚。況乃苔青蘚赤風駁雨蝕朽。可憐嘉祐迄今日。蕪絕前賢在深黝。或者沒字碑中雜元柳。後檢不得遂謂兩先生。文未曾有。是時春雲鬱沈沈。老龍抱珠潛太陰。卻覘黑暗有若泉。迸出深穿。

蟄雷雷亦爲之暗。冷飈襲衣毛髮直。輭土承屢肌肉活。當年曾宿避秦客。客去乃爲二蟬宅。蟬亦仙仙不  
留蛻。吁嗟乎人在蕃中若醢雞。詩在石上如鴻泥。興來撞石空谷自響苔。十萬軍聲鳴鼓鼙。何人結厂託  
幽邃。道是嚴晨暄燠盛。夏含清淒散。仙有福啖鍾乳。旅客亦愛騎青霓。昨宵欲來雨未決。卻恐馴狐笑人  
拙。瀟水淡淡橫古愁。中有照見元侯柳侯一輪月。

浯溪詩

絕壁照字江清妍。影落波底字寫天。有臺託之風翩翩。有尊貯酒當客前。其壁拒客不可顛。卻負曲徑能  
折旋。不覺攀尊睇沈淵。人影字影蒼茫連。與臺遙對及臺肩。是曰唐亭秀娟娟。萬綠裹之墮江偏。迤南招  
提蟲青裕。有水襟寺橋則穿。是曰浯溪聲潺湲。色若碧玉刻佩璫。亭寺夾橋高下懸。臺北寺南雙壓邊。中  
若堂若廡若船。率聚怪石相牽纏。人在畫屏據几筵。石無定相隨其緣。左才半之右復全。玲瓏瘦皺殊可  
憐。樹爲石偃樹以擘。虎豹挈攫蛟龍蜃。就中壽樟不計年。放雲收雲司其權。雲染樹綠飛溼棉。石亦透骨  
莓苔滿。古路可踏溪可沿。繚繞往復心纏綿。有盡藏如無盡焉。乃知林壑規以圓。面面不同如面然。忘其  
跬步越陌阡。若鳥在林魚在川。掩映別有亭三椽。尋其故基仍古先。壁字最著中興鑄。臺亭溪以玉筍聯。  
友讓得宅留紅箋。持正論文出真詮。此外黃米俱騰鶩。此外柳記殊怪祆。此外碎金兼斷璇。上極絕頂下  
江壩。一舉手皆可蠟。石無完膚石不愆。石言若曰何淺淺。卻剔蓬蘽搜爛涎。大有逸字蕪蒼煙。炯如三  
五離次躔。如蛇螭斷謝蜿蜒。文人好名思久傳。不計陵谷恆倒顛。百千萬年年以還。賸有幾字留其堅。人

跡不到疑鬼僊。豈知一一皆前賢。客告余曰。盍舍旂。請就茆。烹清泉。共話漫郎心志專。羣書當戶石鏡便。害馬已去世事捐。蕭然雲月同醉眠。況乃道州馨粥饘。父母何在在我廬。其風如薰道如弦。故宜俎豆常吉錫。百世相感我停鞭。華星一珠吟一篇。斟酒祝公公叩絃。何必故山方買田。但恐巢許囊無錢。

春寒

電光灼冰冰欲熱。疾雷驅下五更雪。奇寒中膚布衾鐵。馬毛蜩縮馬蹄折。石魚山頭曉風起。漣水波紋蹙成綺。只道冷雲無好春。誰知開落半山李。行人猶披青鼠裘。居人擁壚酒新篘。可憐十日不見日。白晝然鐙坐漆室。

洗筆池懷褚中令

宸妃欲閉回心院。英國空謀陛下家。若聽知幾強諫獠。何須議草上官麻。龍蔡豔后貪天醉。鵬臆孤臣感日斜。雙管東風萬行淚。灑來都作墨池花。

鳥語

短竹卑叢錯雜鳴。曉窗不願睡人驚。但能悅耳斯爲快。豈料呼春別有情。繡闌渠儂兒女語。畫船風日管弦聲。若教邂逅陀龍聽。石闕深銜過一生。

望壺頭山有懷伏波將軍

下澤車。款段馬。春紅初齊綠初亞。征人臨鏡照水田。中有壺頭山影圓。壺頭去天才一握。聞道靈蛇大如

屋三千年來素帟首。想見蒼黎當日哭。秀眉將軍真神人。牀下不蒼梁伯孫。名言誠子反賈禍。苾薏滿載徒埋冤。將軍徑充嫌運遠。翻以賈胡遭詬譴。將軍主戰不主綏。欲洗劉武威喪師。當時二耿亦相厄。以後叔庠偏畫奇。吁嗟乎臨軒已覺將軍老。何況讒言塞直道。英雄莫叩囊底智。百戰終當付秋草。將軍稔謀豈不知。羞逐少游游閒兒。生不願雲臺畫功狗。死不願淳酒婦人手。病倒疆場裹馬革。一笑臣心挂南斗。君不見溪州銅柱森峩峩。異代銘勛宗伏波。梁松奈我昭靈何。

嘲北風澧州道中作

西北峒雲頑且頹。怒風驅之黑縱橫。包裹億萬石花雪。欲填洞庭使之平。老龍羣飛抗而爭。半空使風如使兵。屋瓦亂掀如紙輕。屑屑珠玉灑灑墜。窗破帷裂連五更。曉來一白山崢嶸。餘怒在樹猶長鳴。倘一夜力埋谷坑。得不馬仆行人驚。呼童埽砌僅寸許。不滿力士三茶鐙。乃知蜚廉妄庸耳。虛作倒海傾山聲。嗚呼虛作倒海傾山聲。孰雄孰雌徒其名。

澧州

北枕潯與澹。南帶澧若道。澧。澤澹道。四經流名。維西亂源匯。直絡復橫繞。東則江沱注。三派曲相抱。孤城面面水。浮動兀一島。當其夏秋漲。東下海灝漾。洞庭九州大。徧吸亦難飽。四水得所向。君子趨厥媪。豈料江沱至。神力龍天矯。四水能弗鬪。遇之竟弱小。況值圩堰阻。青青覆其稻。築捍各競峻。屹屹對厥堡。水怒不可洩。水徑益以窄。一怒復再怒。森然出鱗爪。齧隄更齧郭。其勢便欲沼。莫恃文良制。文良制石爲。之以分澧漲。及我西東棗。東西

護城隄。秦隄。皆防四水潰者。

不與水爭地。何患馮蠡。苟與水爭地。盪決等振槁。城垣儻不守。田禾亦奚保。且聞上游塞。沙礫挾水草。深渠化淺窞。春泥壅秋潦。若使下游暢。一白湖天曉。今夏四水溢。奔赴疾如鳥。飄風帥猛雨。夜半助其狡。隄泐頽然缺。城危業欲倒。老少相踐踏。壯者據木杪。倚堞手可盪。俯堞膽先掉。咫尺即溟渤。千里一浩渺。雷砰大塊碎。鯨吐萬夫撓。幸賴使君力。不棄一瓠寶。止其溺人笑。授以黃襪襪。稍稍就安戢。一一出流殍。萬手指圩堰。恨不仆其表。人指天亦怒。頃刻大波掃。宜私園齊開。水乃得洩。六晝夜水退。相與卜平燥。當夫昏墊際。悔不疏淪早。及夫灑澹後。晏坐食新粍。所望賢通侯。高踞雙目瞭。此利彼必害。灼見析豪秒。俾城作鐵室。治水去毀擣。圩堰可決決。黎赤仍不擾。陂有兩黃鵠。野富六穰藁。卽看雪霰集。林邑便已浩。下走樂無事。濡筆紀豐兆。詩成九澧側。凍日紅杲杲。

### 大風渡澧水滿天雪意

郭外朔風殊跋扈。田閒輓水亦春撞。寒煙一雨便沈屋。落葉萬鴉同渡江。倦骨入冬翻覺健。雄心當酒未全降。馬頭莫惜征衫溼。看取年豐雪打窗。

### 贈王大令香杜兼呈鄧湘皋學博

銜卹未得歸。墨經行且朽。色養未能遂。盼斷倚閭母。勁風從西至。人獸盡東首。悞抑孝子心。孤館一鐙久。孝子固良吏。慎受慎所授。不揣污鱗意。乃致讒謗口。今豈必直道。弗媚衆卽詬。況復工爲文。世道例獲咎。文章至今日。積弱不可強。稟賦益以薄。風骨何其尪。必有扛鼎力。美醜斯可商。不乃吹死灰。折莖驅跛牂。

君筆鐵鹿盧八角森鋒鋌能績人怒嬉與龍擊鳥鵲先秦兩漢閒其氣宏且剛上取縱得中不失韓柳行誰謂宛轉絲能敵百鍊鋼

直竹中箭筈羽鏃益厥殺健筆入無閒萬卷成厥大才識生於學學生於不懈文始須放縱繼乃戒撻快渾渾其源來江海一蒂芥上明周孔道下與出處對固恥傍門戶亦必緇佻怪此事出天性悠悠古今會與子行將別請俟異日話

東海何洋洋子懷電買才安可便廢置尙有黃金臺名山多餒魂焚溺蝨魚灰窮達戀薄祿萬一親顏開得志行吾學百折不可回否上萬言書長嘯歸去來

斯文吾道閒清切惟畏友與若己者處譬鏡寫我醜吾拜先生筆欲作每箱口吾拜鄧子詩握管輒棘手前有大敵在角逐慎其衄脂澤哀駘姿冀冒孟姬首子今去長沙誰濯我背垢急歸招鄧子促席連卯酉各有名譽心偃仰看南斗

題孝女張淑先籲天養藥圖

讀破岐黃書不如揣病情父寒父熱女則明投熱毋投寒女一議出父乃生代死古所難天公憐其旨血疏上奏女竟死篋有焚餘草草未出時父病已嗚呼使曹娥聞之得不先逝婆娑神緹縈贖父書僅以春羹聞嗚呼淑先女叔先雄豈前身

賀湘皋移居

欲將安樂行窩築。其奈茆龍葺不新。湘阜寓散齋。屋宇甚陋。造膝喜當交讓樹。窺垣時見一方人。君下榻散齋。相得甚歡。又精醫術。時

與老親診視。炎歊卻掃同扃戶。風雪移居又買鄰。遮莫張羅官署冷。尙嫌熏灼庾公塵。

不由旬地接書堂。家貨遷來有底忙。祇許琴尊環白醉。漫勞車馬識青楊。寄貨已自煩裘冕。謂康大中丞。假以儼屋貨。

貨廡終須對孟光。明春眷。屬同來。料得玉潭新講舍。早梅無限待詩香。

歲暮雜感次前韻簡湘皋

眼底茫茫風雨集。天涯草草歲華新。居州未必工齊語。莊鳥徒勞感越人。肯爲分金儕北郭。屢因撲棗戒

東鄰。年來飲徧沅湘水。依舊萊蕪飯滿塵。

豈有天花落講堂。談經習業爲誰忙。曾披椒檄求芳草。要屏箏琶聽折楊。殘客儀形忘謝諫。故人風味類

思光。謂湘阜。青熒鐙火宜相對。領略齋廚晝粥香。

湘皋以歲暮書感詩見示。獎詡過情。因疊前韻荅之。

齋居見說清於水。風雪初闌物候新。卅載無訾堪坐客。連宵聽雨定懷人。謂湘阜之兄雲渠。君如蔣詡開荒徑。我

爲東坡署德鄰。坡公有德。有鄰堂。試杜席門欹瓦枕。喧喧多少馬蹄塵。

問奇載酒叩書堂。信有磨人子墨忙。盡道有才過屈宋。劇憐說爽得王楊。謂東。萬金良藥蘇沈痼。一割鉛

刀愧步光。我自蕭齋拜詩佛。夜寒親試玉蕤香。

詠史仍疊前韻

粟轉梯山連歲腐。蝨生甲冑幾回新。定知領領稱飛將。不是恂恂一鄙人。爰劔竄身翻蔽篋。涿鞬突網轉  
駟鄰。若教狐兔輕鷹犬。誰掃輪臺傲外塵。  
出奇休恃陣堂堂。銀鶴虛奔底事忙。未見兩眸皆脫肉。卻疑左肘屢生楊。老謀已竭哥舒翰。將種新除斛  
律光。料得祁連無雪阻。西風萬里戰袍香。

湘皋見示移居後連日大雪之作。即次其韻。

風屑稽灰勢未殫。臥聞冰箸墮珊珊。舉杯欲共天酣醉。命駕先愁海浩漫。人迂王恭初著屐。詩踰東野不  
言寒。誰知妥竈蘇蘭役。別有青腰玉女官。謂新納  
姬人也。

醉司命日作。復用前韻。

筒裏錢刀日益殫。尙思朋酒姿盤珊。黃羊亦是尋常饌。郭禪原非耳目官。信有日明何可煬。不因人熱乃  
能寒。糟糲抹後朝真去。祇恐風多雪復漫。

雪後嫩晴。倒疊前韻。

銀蚪掉尾避蒼官。尙作春來數日寒。此土已戕旁不冝。岳州今歲多皃。此番  
雪後。當無這種矣。我師猶戍折羅漫。老梅姪姘  
欵香玉。小竹鬚髻綴女珊。欲趁新晴挈游榼。卻愁泥滑馬蘭殫。

追題黃丈東井五老圖。應其嗣君支山屬。

二老踞亭倚檻話。二老藉苒書作界。坐石一老風骨最。是漢循吏次公輩。朗徹其裏碩厥外。讀書成誦瀉



水快爲政禽賊不用械。不廕所仕塞其兌。歸來息園解冠佩。遂與四皓成古會。花竹瀟灑地幽隘。往往談  
譎出光怪。二江夏黃侍而介。一進酒一杖而艾。支山侍旁持杖杖頭挂艾四賓色怡一主對。各有真意各天籟。紛紛偃  
僕戀冠蓋。鐘鳴漏盡不知退。聞先生風得無悔。先生父行我所戴。杖而艾者我所拜。老成典型吁可喟。試  
看流星入昴內。

題闕畫師嵐觀潮圖字雲山

兩龍伯操繫海練。勢自東走飛入西。萬雷裂雲萬牛吼。聲自地腹穿天臍。況當月皎冬霽霽。浪花白壓銀  
河低。喝月月倒行。吞月月無影。素車白馬欲到未到際。但覺橫空一鏡當頭冷。清輝直射雪山透。怒流曲  
卷圓珠聘。其下島岸秋毫見。其上星斗動搖頃。我曾邂逅錢唐潮。聞道海昌尤怒駭。君在海昌觀潮因作是圖歸來仰  
屋畫不得。谷分厓畛徒喧囂。畫水有聲況畫潮。天意特遣張僧繇。先生笈裏有龜赭。八月枚乘拜其下。

闕畫師嵐我與我周旋行樂圖

我未晤雲山。不知其人視其友。圖中盡乾嘉間名流所作我已讀其畫。卽今誰是宋元手。我識雲山壯時面。火色高頤  
目如電。才名卅載食無肉。聞道龍鍾鬢垂練。自照已非當日顏。彩筆尙轟金琅玕。卽今誰是宋元手。我與  
我外殊無偶。

乘迅流賀逆風

乘流快意下。風又助其駛。曾否窺落溘。無亦觸坎止。風水力一悟。雙櫓戛不已。三老詛風伯。不計上瀨彼。

上瀨爭尺寸。帆纜互相倚。依然背篙叫。手繭足交舐。風性至無定。旦暮不可恃。水萬折必東。吾亦欲東耳。好山常俯仰。倦鳥同臥起。況聞報郵籤。日已行百里。

沈栗仲同年宰鄆縣。以弦歌化之。邑能鼓雅琴者四十餘戶。其治可想。以詩贈之。

一夫弦歌千室鳴。古有單父東武城。三代以還無此聲。此聲能使王侯貞。閒暇無事修太平。化我鷓鴣哺所生。雲秋之水北入沫。上有神父秉周禮。攬深醴愉萬事理。偶欲登高臨淶水。諸生十百希厥旨。路人咸詫問所以。指絲桐曰命之矣。茆厂夜月彈流泉。杼聲書聲相糾纏。稍涉北鄙便自愧。何況洙泗斷斷焉。邦君憑軒廣古篇。邦人和之如衆僊。趣拜炎陵求練弦。翦其青牛剉雙角。夔襄薦技班僮鑄。君曾取炎陵梓作琴神農大笑投赭鞭。此調不傳數千年。恨君不識袁孝尼。恨我不識元魯山。于焉于曲已徧誦。廣陵妙散胡可慳。不成章我亦不作。但欲博我高堂歡。時欲就君學琴進觀君藝何爛爛。能詩畫書奕劔丸。所可測者器數閒。不可測者海波瀾。廿年同舉今甫面。冰雪同清鐵同鍊。悵悵琴德美可眷。君山豈受宣平薦。五技都窮臥花縣。何當密友羅曲宴。三疊胎仙舞深院。座中那有鍾子期。祇恐駟駒側冠弁。

郴州五蓋山。至峻屹。其巔有峯益高。戴龍湫。湫下坎產石。若端溪。郴人取而礪。不知硯材也。刺史曾

君鈺識而寶之。以為勝端溪。下巖丁亥秋。余在長沙。忽一夕夢造刺史室。室盡硯。邀賞之。遂懷一去。覺而寓書於刺史。以為笑。時絕不知有得硯事也。刺史荅書。述果得硯。故且詫我夢。我亦自詫其臘小除。刺史餉硯二。啓視之。皆夢中所見也。刺史有詩。作此奉酬。

五蓋齒齒留霄漢。上猶有峯安可窮。其峯兀戴神漢云。是雷電龍所宮。潛源一綫穴南游。靈液饋餽蒸  
雲紅。雲乾液枯漸可割。化作百萬圭璋琮。何人欲斲不敢斲。斧鑿落處飛晴虹。尺寸偶挂使君眼。云此實  
與端溪同。試琢平坦著子墨。其色黝黝花叢叢。能飲陳思八斗血。能了潘谷三年春。左右驚膽詫環璋。使  
君荷舌親相從。使君能文善隸古。以石爲友書爲農。故因華妙聞帝所。册以卽墨諸侯封。況復俎豆韓張  
李。得不誠感昌黎公。時正潛北湖建韓文公祠。而以張員外李使君配食。報以文玩助文藻。濡染柳筆傾湘東。卻怪遲錦與江管。無  
乃夢幻空其空。而我以夢詣君所。自堂徂室窺簾櫺。畫屏棊几發奇怪。是何物者光熊熊。如肌肉活怯指  
按。如煙霧凝愁風攻。紫者膩墨比刮竹。青者摧墨儕撥糴。一廬之內臥礫礪。有似馬磨環其躬。我懷其一  
拜君去。仿佛度嶽聞清鐘。覺來挑鐙索席扈。依舊敗瓦欹詩筒。乃修魚素博君哂。君蒼有鹿藏隍中。我欲  
順途詠其事。君乃錦帕雙其蒙。繩開匣啓爛然出。與夢所見無殊蹤。急斟井華過一斗。不暇作字專磨礪。  
麝香漚鬱衫袖斲。一笑殘歲崢嶸終。轉憐硯不入君鑿。女以搗練男銛鋒。有若偉士遁荒隘。頭白志拙無  
遭逢。卽今走馬望五蓋。欲詣君室偏匆匆。何妨昔昔夢爲僕。手把椎斫披蒙茸。并擬撰銘五千首。一一劖  
徧仙芙蓉。大呼石超爾何在。曷亦拜倒曾南豐。其顛峯有石超道人題。千雷萬電等語。

忠孝女沈將軍歌

獻賊殺人若薙草。長沙以南無完堡。避賊鋒者走且僵。諸統制師皆女郎。守備獨以孤軍當。孝女父沈至緒。殄賊  
過半身乃戕。身戕其骨爲賊得。孝女哭父淚盡血。刀如青霜馬如雪。白甲白旗白袴褶。一隊銀龍翻虎穴。

賊見孝女疑飛神。弓不暇彎。矛不穩。但覺仆如木偶人。多羅棉手。劍鋒利。左鋌右鏃。恣我意。帳中萬賊俱伏地。忠臣骨在孝女肩。歸來一慟雲黯天。環陣士卒誓死守。忠臣屍與州城全。獻賊不敢窺其藩。孝女志與州城堅。詔褒嬋媛晉遊府。十六芳齡帥貔虎。五嶺以外聞其鼓。鼓聲忽死。塵不揚。天涯熱血埋干將。夫亦戰死爲國殤。孝女夫買萬策夫逐父去魂洋洋。妾感身世何蒼涼。脫我綠沈之甲還。君王雞斯徒。跌奔故鄉。青鐙萬卷聲琅琅。殺賊手說經口。宣文女徒環座右。花時不作兒女夢。夢見彎弧射天狗。滄桑一變無何有。只此能忠能孝能節奇。女子女雲臺上三不朽。况復文能傳經武。戡亂俯盡天下雄才首。君不見明璫繡帔麻灘祠。異代猶作勤王思。嗚呼孝女何其奇。

書劉母田太宜人事應觀亭司馬之請

太宜人姓田氏。雄縣巨族女。公子。父宦伊涼。侍杖履。芳年玉映蘭閨裏。孝經內則常在手。更尋列女到彤史。喜觀相人書。喜覽聿斯經。喜繙靈蘭祕典冊。喜講司空城旦刑。學成一笑凌青雲。百家古有義成君。斯時劉大令。正宰古浪縣。宓子琴絲忽中斷。誰歟來續鴛鴦線。太宜人歸甫卻扇。卽能撫前夫人子。如己兒。憐其羸弱不可支。趣爲納婦似續斯兒。薄祿相孫含飴。大令政成殞厥命。官衙鴉散雪霜迸。嗟哉太宜人。血涕掩鸞鏡。以一手持大廈傾。以一手扶旅櫬行。提孤挈嬰愁避兵。突風吹到刀槩聲。萬賊據險不可爭。急卷雪衣投柳營。兒羸兒弱竟以哀毀死。可憐兩樞父若子。卻願牂柯尙千里。有姪廷模遭諸途。涕交頤。下紅模餽。姪已遴選不入都。願送阿姆還鄉閭。便卜窀穸藏王冕。與吾宗者廷模乎。奈何欲以閒冗出。乃

搜購布摺珠翠遂以貨傾大尹秩廷模迎養楚水濱太宜人笑花縣春太宜人歎廷模詢其諸官事失厥倫太宜人曰爾治爾邑無冤民我歎我親未邱首我生未履易之阜此生得照易水否到時族黨知何有阿誰能似聊曼母廷模一朝報最北入京板輿遂過雄之城太君不識東平塋忽遇田父僕而耕問之指點說宰樹再拜祠下感霜露父老太息子弟驚乃屬子弟往迎雙玉棺由都下以窆易干嗚呼田氏有孝女劉氏有賢母相夫治劇久訓姪治譜守使夫有孫繼厥後使姪佩印大如斗使親得瘞故山右今紛紛拜太宜人者皆廷模之友乃問吉嘉問凶醜云能貫穿李常容包括鳴雌負我正告諸君曰問太宜人當以大節先求之古豪賢恐無多讓焉

道光辛巳夏秋予兩過東湖高芾堂前輩適守鳳翔爲東道主丙戌戊子之夏予兩試衡州芾堂觀察是邦兩招飲於湘蒸之齋撫今追昔匆匆八年矣賦此志感

東湖之水碧且黝君投其盃石螭吼蒸湘之水弟若兄君挂其笏紅亭明坡翁一別韓子迂可惜熊魚不雙炙爾來王佐頌邦君已見文章開講舍不疑自守慈母訓與祖一任妻孥訝觀察署中無眷屬然夏非夏秋非秋屢以雀躍從君遊憶昔醉我岐下月鳳凰耳畔鳴啾啾君歸我臥兩寂寞明日蹀躞周原頭豈料共飲蒸湘流手拂石鼓維扁舟十日閉置作新婦一朝泮散如風鷗驂驪八載幾彈指我驚其面君鬢矣各有高堂皆髮白苦無二頃供甘旨公侯袞袞君其徒曾讀城旦司空書我似鷗夸託屬車未免瓠落慙江湖前年酌我紅亭側竹樹團團裏筵碧今復期我衡之屏想見九疊環亭青有岳屏小飲之招尙未赴也何時再訪璜溪

釣。只合出門西向笑。瓊溪屬鳳翔。

贈譚鐵簫太守光祐

譚侯貴公子。慷慨多大節。朱門少年日。開口怨離別。袖中五色管。盛夏集冰雪。翩翩困科第。前輩盡傾折。

投筆未四十。才名動宮闕。家門骨肉苦。朋友遇合缺。舟車竄風雨。肝膽變胡越。仰天吐偉句。真氣偃溟渤。

其來無首尾。其去彌盪溢。其勁若引滿。其曲若蟠屈。只留青蒼色。不受脂粉抹。藏園避其鋒。子山拜其律。

謂吳關雪舍人。獨於西江社。施以杜韓幟。看花席尊酒。射虎挾箭筈。一篇偶飛出。傳誦已嘖嘖。或招金閨彥。或入

玉人瑟。譽滿侯。不怡危坐求古昔。公卿塞閭巷。無路取簪黻。竟騎將軍馬。殺賊草羽檄。功成薄受賞。踏遍

蜀山兀。衆水在指掌。環混不能溢。可書便可繪。談笑江漢決。侯著有四川水道源流簡明說。爾來向南楚。美政不勝說。封

侯已遲暮。况乃未騰達。前席求異才。賢喆爭擢拔。得權功乃大。詎豔乘塵鉞。我昔使益部。晤侯摩訶側。忽

忽六閱載。聞聲每傾結。行部見資邵。兩江會而激。辛巳秋遇侯於四川試院。頃按試寶慶府。風侯為提調。衙官到屈宋。流汗愧且蹶。

旁午必劇談。露曉與鏡夕。侯氣清而夸。侯論雅以質。渾忘古劔銳。但覺大圭潔。英雄固名士。兒女亦仙佛。

侯有英雄兒女圖。我懷湖海志。共此一腔熱。喜聞忠孝語。力掃迂懦轍。讀侯卷未盡。起舞更叫絕。想當歌哭際。吹

裂六州鐵。侯又有吹簫乞食圖。作者不經意。聞者輒嗚咽。即今好風日。花發水清澈。春風貫簫孔。山勢屹詩骨。茅亭

踐蘭約。洗耳聽奇突。金石留逸響。蛟龍起深窟。蒼茫千萬感。爛漫二三月。

題李海峽太守海上釣鼈圖丁亥

癸風初緊。客棧占有大星來。軫車乍覲。面乃等疇昔。便喚滄洲老龍伯。肌髮光細。僊之人。飲我白湯如  
飲醇。卅年循政。浹澗水。能化巨盜。作順子。何況鄭兒開門孤。所到盡以家公呼。情慤德滿意。款款益爲文  
儒。白玉管吐辭。淵雅天所授。東郭順子人意消。曾從絕險造平澹。山嶽壁壘不可撼。釣竿撐突天地臍。瀾  
東以至蒼梧西。君自浙來永州。與任公子湖。水以東蒼梧以西之說相應。五千之轄。一鉤月。鼇不上山。律瓦誰知六六齊。點頭蓄以  
盃水以芥舟。才雄志大類若此。眼中詎有任公子。前席晝夜求軼才。使君握電驅風雷。一日九遷無喜色。  
一息六月豈太息。況復水清山古幽。友猗玗子友柳侯。虎符龍節果來逼。袖中放出奠柱力。何時海上三  
神山。十丈珊瑚紅一竿。希有烏拂大鵬翮。笑倒君家釣鼇客。太白有大鵬遇希有鳥賦。

題陳西侯問津圖三首

問渡從來不繫船。誰教越客此停鞭。江潭柳色春如許。擬觸名場二十年。  
賦罷姬隅漫自猜。驂騑道路劃然開。劇憐驚座通侯氣。元是微雲女壻才。西侯爲吳山尊先生壻。  
錦作蓬萊玉作京。幡仙指處最分明。定知馬穩春山闊。不向青苔仄徑行。

山行看花三首

桃花冷雨春濛濛。和以溼雲從以風。馬蹄汨汨踏泉脈。山翁掩戶笑行客。一叢穠李出竹枝。玉顏翠袖天  
人姿。綠章今日達帝所。孟婆前日已含怒。

山花開落風雨司。瓶花開落自主持。瓶花無根不可活。山花落盡行復發。有開無落花之心。不風不雨花

不禁。但名爲花總須落。請看長松臥深壑。  
巖巖絕巘花因依。斷橋僻徑樵素緋。不受豪家畫檻貯。不上玉人雙鬢去。如雲如海搖東風。日暮可憐誰  
與同。鶯穿蝶抱皆知已。況是攜尊賞落蕊。

辰龍關

我曾徧踏黔蜀山。辰龍卑卑不足數。祇緣峽立四壁鐵。天割一綫不可補。萬里風來洒客面。帶溼之雲黔  
之雨。沅南羣峯盡綰轂。夸望亂源繞門戶。卽看鐵星陷石臼。嗟哉逆藩此最怒。頻年自恃雄關閉。豈料聞  
道通貔虎。高崖細溪左右出。更抄清捷背張弩。賊進喪膽退失據。黔滇自此摧螳斧。名山自昔多窟穴。如  
蜂巢簇如齒齟。淮陰曾拔并陘轍。武惠亦避劍門阻。傳云在德不在險。天竈凶門誰敢侮。何況辰龍瑣瑣  
耳。以逆犯順盜憎主。春山卉木紅連屋。晴日鷓鴣啼到午。馬蹄人影自來去。前村正打催花鼓。

仙人房仙人劍詩

斧剛壁立窺江傾。上戴棟柱樓梧撐。仙不世居此閒營。自人視之答簪盛。仙或視之華屋盈。了無風雨飄  
搖驚。兩崖對拆數檣橫。眠一長劍丹青明。後其臘鋒前其莖。莖首有旣銳而輕。大匱蟲蟲舟庚庚。旣置家  
貨復貯兵。仙人無乃恆人情。當年有路通客行。或石未泐壁則平。或水勢高凌崢嶸。偶簇朽木得氣精。人  
則爲之似天成。向後路斷不可耕。空際遂裏煙雲生。衡風琅琅木葉鳴。猿猱仰羨蒼若麤。今宵天開月則  
清。其諸仿佛來鶴笙。我欲一假干將擊。卻恐吹鼻啞無聲。



題鄧子與詩卷應湘泉屬

字逸詩清人磊落。蒼茫一幀至今留。能吟誰識連文鳳。感舊偏悲釋貫休。子與明遠逸其詩甲詩僧某亦遺老事去劫灰餘冷淚。時來寶月入冥搜。先生有志肩文獻。無限沈珠待網求。

泌溪垂釣圖爲歐陽同年題名信

信之父竹庵先生。孝養其母。母嗜魚。因釣以供饌。母歿後。惟祭一釣也。其詰嗣信出此圖索詩。

五侯之鯖五鼎養。不若負米急朝餉。魚監之魚取諸官。不若隱君青竹竿。素鬢既割薑桂醜。老親一笑捫其腹。溪水迴曲溪風妍。又送唳聲來耳邊。岸巾以晴笠以雨。過者疑嚴復疑呂。枯魚銜索一朝殂。肝跡漸掃。落痕蕪。偶因薦新理芳粒。旁有季蘭助其泣。謂公配何孺人至今溪流玉潺潺。想見道穎清而閒。冰下老魚慎勿觸。曾飽當日仁人粟。

詠史

劉尚師全覆。陳湯老據鞍。有書招贊普。無劍斬樓蘭。輓粟談何易。懸軍古所難。微聞漢恩厚。將相已彈冠。

大龍驛雙桂軒

我今五渡漸江水。愛此雙桂幽且妍。漸水在三十鋪好花一度未曾見。明月三十七回圓。山僧行腳過萬里。館人白頭已廿年。往來數數殊自愧。忠言奇謀奚在焉。

再題龍陽驛館

寒日未曠。亭光已向東。煙馳大地白。霜瀟半天紅。帆布支提杪。人家菜把中。欲招圖畫手。破曉坐微風。  
橋曲四五折。花增千百羣。使君能頌橘。過客正書裙。董大令阿耶在園讀書綠厚園逾古。茶香鳥共聞。登高知政理。耕織日紛紛。

呂麗堂太守射虎圖 戊子

民奔呼。山有虎。朝暮食三人。一媪一婦女。民奔呼。太守呻。虎胡爲哉。噉我赤子如噉豚。糾我衆。礪我矢。虎來虎來爾必死。虎不負。觸乃走。墮得無政。感神所相。虎就誅。殛訴無狀。白羽洞背直達吭。虎魂零星。虎膽喪。殺虎如鼠歸來歌。太守之勇于廣何。恤其被齧。弔其室。太守之仁與均敵。斯時穉穉黃雲平。腰鎌夜穫無恐驚。害除民樂設社酒。招邀健兒飲一斗。

小谷黃丈善繪事。言湘山之綠勝江南。因賦此。

柔風東來小波舞。夕陽睡起湘之澗。但覺蕉梧繞窗戶。不道羣山碧如許。近山茸茸如裹煙。遠山楚楚混遠天。小橋叢薄幽折入。奇石老樹周遭圓。誰歟畫此山。嬋娟癡黃大呼山來前。廿年夢裏盡蒼翠。要與造物爭天然。六朝雲氣滿行篋。片片墮入西巖楫。憑將十斛好螺黛。染取百幅羅裙褶。春歸嫩晴殊可人。米家几研若爲新。祝君畫取詩中意。消得柳侯一綠字。

題黃小谷畫

楚楚丹黃壓樹鮮。疏疏籬落帶花妍。緯蕭亦有江干屋。吹破西風已十年。

杏花飛燕柳柔柔。屋角春禽促駕牛。縱不有秋聊自樂。絕勝辛苦覓封侯。

蒲圻道中

鐵纜雙糜巨艦排。馬蹄浩浩走風雷。蒲山勢到沙羨俯。修水源從下雋來。萬頃稻肥秋雨缺。三更雞睡大星催。蒼茫憶古空搔首。不見東吳右部才。

澗湖

距漢口鎮十餘里。有湖焉。匯澗水及江支流。阻塞孔道。約四十里許。春夏閒非舟不能渡。秋盡冬來。則成坦途矣。

排空萬櫂舞漣漪。無限斑駁脫玉羈。人道秋田特甘井。天教夏潦作湯池。商量更鑿梁山灤。反覆誰歌鴻郟陂。時有廢湖爲田之說。卻愛遠村開夕照。柳行如屋竹如籬。

有感

濃朱厚黛損天真。況復蹒跚強效顰。但倚市門都辦此。何須絕世浣紗人。連宵珠彩貫晴秋。月在東南第一樓。喫詬離朱皆不得。卻教象罔漫相求。

黃陂道中

南司州地才經過。平楚蒼然四望陰。金氣西來風跋扈。旱雲東積火燔燭。忍看龜兆千尋坼。不乞龍鬚一滴深。我亦鋤犁能把者。苦無千頃換黃金。

武勝關

晉慕直轅天下險。今驅羸馬踏雲來。了無磴道千盤峻。但覺回廳萬壑哀。淮漢背流收亂水。申黃自古鬪雄才。果然談笑能擒賊。合向牛醫耐一杯。黃叔度檢司馬龍故事見天祿閣外史。

西平道中

刺促成何事。差池不可齊。功名上蔡犬。歲月汝南雞。種種憐秋髮。紛紛憫夏畦。誰歟佩霜劍。淬礪向棠谿。

臨穎道中

日暮途歧已自憐。何堪猛雨助憂煎。潦翻一馬行將斃。風殺雙燈不可然。羹飯無緣瓢欲棄。衾裯何處榻空懸。楊朱失路渾如此。忍誦駢夫四牡篇。

穎川書感漢穎川郡今許州也。

穎川黃與太邱陳。怪底精靈感召神。庭廡時時下鸞鳳。盃盤草草聚星辰。豈無北舍來鶻雀。亦有東行說異人。畢竟傳疑卽傳信。薰然明德藹如春。

曉熱

山形入莽蒼。秋旭向昏黃。露稻通宵重。風荷隔塢香。心疲成漫曠。語癖漸疏狂。試問勞勞者。曾思枕簟涼。

過新鄭喜晤家益堂大令德增

相逢韋杜鶯花曲。爛漫同傾瓊盃。入座樂緣車武起。叩門聲識孟公來。青山歷歷游如昨。宦海茫茫首

軍回今日驅車尋枯枿。鄭南門也。人傳君是惠人才。

由豫入燕日日看太行


自渡金河北連山盡太行。鬱雪朝礫礪團月夜蒼涼。形勢幽并豫。波濤沁衛漳。西虹飲東海。千數里而強。

邯鄲懷古

若花顏色夢中栽。錦瑟銀箏絕可哀。豈有壽陵能學步。斷無廝養解憐才。溫明尙記蕭王殿。歌舞難尋主父臺。祇有宮池舊眉影。夜深還化月鉤來。

索炬歎

一月不雨稻不粒。東疇西疇屛水急。官符夜下鳩丁男。明日行騰昇貴官。鞭之不起訴非嫻。心逐枯槔輪裏轉。歸來一飯未安處。忽聞伍伯詬且怒。踏破柴門索蕉炬。



程侍郎遺集初編卷三

戊子八月十四夜借祁春浦中允昆明湖踏月八月初九日差旋復命仍入南書房

秋生玉宇瓊樓夜月在長楊五柞閒黑處樹陰明處水紅皆臺影碧皆山幾年官耐侵銅斗一日春雷響獸鑾似此蕭閒仍富豔何勞清夢戀江關

春浦中允以余卜居鄰近投詩相賀即步元韻奉酬

更謹酬知未敢豪漸看舊繡拆波濤論文喜得元才子取友無如左伯桃願以清泉灌交讓何妨暖柏集寒號用要嫌松柏寒聽逐桑榆暖詩意而反之怪來童僕皆親暱闔戶曾投一蓋膠

春浦中允以余埽直齋奉母賦詩相賀仍疊前韻

侍學三天感二豪功名草草付雲濤先大夫在尚書房行走十餘年魚軒曾借華林馬時家慈曾到澄懷園鳩戲爭嘗御苑桃時澤甫獻

屢食賜珍重埽秋窗迎竹笑漫勞夜雨起疥號迎板輿前一風雨交作風前欲博慈顏醉合乞宮壺九醞醪

題陶孝女刲臂療母冊應王可權學博

金翦截臂肉流血被肢體壯夫且弗勝乃出十三弱女子一櫛墮地覓不得蹤思再割手無力竭誠作氣爭頃刻氣偶一弛不自克弱女處此何從容一翦委地如殘紅再翦入水煎芙蓉兒肉如兒心知母病所行且攻兒肉即母肉補母痲瘠母乃充母有病兮兒有藥強飲強食病不作吁嗟乎十三齡弱女子豈有

沾名心宛轉托彤史。設思親病親吟呻。孝子便欲忘其身。苟有一策可拯揀。何暇計及要譽於友於其鄰。嘗沾名者胡不仁。請觀十三弱女子。一割再割皆天真。吁嗟乎一割再割皆天真。豈期名著邀恩綸。

春浦直廬後垣黃菊盛開賦詩見示卽次其韻

楚楚黃香壓帽斜。鈴鈴秋影上烏紗。曾窺靖節鬢髻柳。菊以小而黃者爲上。靖節所賞卽此種也。五色種起于晉以後。靖節所不及見。不作重陽爛漫霞。地僻滯霜還滯雨。賞稀疑草復疑花。相逢欲以兼金鑄。特爲新筭舉畫叉。

扈蹕車陵途中口占呈同直祁春浦

又作鴟夷託屬車。滿斟醇醑腹如壺。斲窗取艸吾何拙。給札成文子甚都。踏碎月華花款段。搖殘燈影錦屠蘇。毛錐也具封侯相。寫到邊功膽倍臚。時皇上告西陲功於東。陸故御製詩中屢及之。

雪後經冰沼上風景如畫

一白全遮一碧圓。有冰如鏡雪如氈。潛魚黑失琉璃夢。遠鷺明投卷畫天。屋角火溫千墜筋。塔輪風急四馳煙。羸驂合稱歸籠袖。詩與寒花共壓肩。

雪中退直賦呈同直祁春浦池籬庭

敗葭髣柳覆江岸。中有老漁雪沒軒。詩心畫手競撫寫。那識天上風花爛。觚稜金爵皎於月。不待東明已先旦。白連龍尾幾千尺。紅掩畫樓才一半。溼雲封牖虬漏澀。香篆舞簷鴛瓦泮。風前烏鵲總馴狎。午後貂狐各分散。九重疊下寬仁詔。大祀特獻精誠禱。南郊大祀之後。瑞雪應時。故應呼吸動陽雨。能使人物無天艱。我曹素



筆書大有日。侍玉皇青玉案。微吟便注龍香劑。每食恆拜醜醜灌。豈無薑芽凍十指。共坐暖閣春風慢。歸來策騎經太液。但見丹虹飲銀漢。可憐草竹半摧抑。只有青松森直幹。欲謀一醉款二客。其奈驕驄不受絆。便當獨對冰壺子。破竈空庖無可爨。明朝且緩趁官鼓。時充國子監祭酒。每朔望不入直。臥聽寒雞聒枕畔。

春浦和韻見示因疊蒼之

乘桴桴廣須至岸。裁衣衣長宜蔽肝。心光筆力爭一到。乃與張蔡同粲爛。何人夜呼孔賓出。翦刻花天繪霞旦。遂將郢雪蒼下里。運筆如風燭未半。鳩鵲雲從兩袖起。太液冰隨一笑泮。君如蛩蛩我如蟹。蹤跡年來幾合散。自慚鴟夸非國器。乃使蕭艾同熏祿。君適用若儉歲稷。我無成比不才艱。記會同踏洞庭雪。俯視岳麓平于案。記會黔楚兩相望。有酒相餉瓜共灌。我於行部訪文教。無限生徒指經幔。秋來同直屬玉館。舊事蒼茫付斜漢。池波汪汪憶叔度。謂左田先生。直氣侃侃推公幹。君詩近境益神變。天馬全脫朱索絆。我詩成便自焚草。君審聽謂奇音疊。筆僵墨凍正惆悵。又見稽灰屑天畔。

倒疊雪中退直韻贈池籬庭

紅杏先生酒尊畔。扼腕屢歎柯亭爨。行過古滇得池子。自詡飛黃入吾絆。宋芷灣先生其文詩集曰紅杏山房籬庭受知芷灣先生最深可憐紗帳已蕪絕。剩對范陽盧子幹。余亦受知芷灣先生今先生已作古。喧傳詩句御屏上。金管琅琅賦銀漢。用蔣防事。金秋持衡出關陝。爭看英姿挾車幔。籬庭典戊子科陝西鄉試。拈來高第日五色。鑄出椎成劍千灌。天顏一笑賈前席。復命後奉特旨入南。蓮炬兩行蘇侍案。彩雲在牖霧全駭。碧雞來儀羽不暇。籬庭滇南人。故用滇事。與君搖佩踏初雪。正值紫壇禮

圭禠黃羊大夫有種行。使我疑慕不可散。謂春浦汝南月旦去人遠。到來恐已硯冰泮。謂許渙生時使君才  
 能造鳳樓五。我書不及袁豹半。神仙官府祇文字。山水清輝改昏旦。時余寓西華門外。入直退直必過金龍玉鍊。直壺中一語使  
 移晷。每見人閒斧柯爛。詩橋驢背猶憶灞。冬冷兒衣總蔽飢。蕭庭甫自關中歸。余時忝官祭酒。擬搗臘粥祭詩佛。莫讓閨  
 仙踞彼岸。

總憲潘芝軒先生六十壽詩五首

昊天佑聖清。嶽瀆生偉人。忠孝荷兩肩。五福備一身。廿五魁天下。玉殿行麒麟。四十躋尙書。磊落社稷臣。  
 時退復時進。朝野知其仁。一以致堯舜。一以娛老親。出處關大節。先求心所安。親老胡可離。主聖胡可閒。養志能延齡。親壽如南山。退補進乃忠。正色臨朝端。  
 曾閱日益少。公爲人所難。稷糈卽曾閱。易地則皆然。孝養有畢日。君恩浩無涯。里居十數年。心耳通民嗟。讀書益精貫。灼見正與邪。培善培其根。遏惡遏其芽。  
 領袖獬豸羣。開口吐天葩。揖讓赴容臺。風度何輝華。時攝大宗伯黜然一古鏡。照見垣一方。瓌兮一大圭。人神肅相望。渾穆已難歧。況乃智且明。輔翼持大端。論思握宏綱。  
 北面萬弟子。欲窺不可詳。南斗聲環環。太湖曉蒼蒼。三朝數耆舊。四海疑公年。公年甫六十。人望如古賢。不以黑頭相。易我萊衣鮮。故能葆其真。學養通性天。  
 富貴身外物。要以謀謨先。槐鼎在指顧。竹帛方爛然。祝公劭明德。懿戒歌賓筵。

己丑初春赴激懷直廬步祁春浦韻

會記聯吟秉燭遊。靈光舊跡杳難求。感君才氣追黃鶴。謂左田先生令我低徊到爽鳩。起草猶留當日石。用薛

事以先大夫曾直激懷園近光樓也踏冰重上夕陽樓。是日與同直登近光樓壯夫有志非詞賦。莫惜江花不忍投。時春浦以經義治事自任

述夢一首用前韻

大鵬希有兩遨遊。豈料莊生見彈求。城郭都猜華表鶴。兒童爭唱白苻鳩。春聲寂寞雙柑酒。海氣彌漫五色樓。卻歎匆匆老夸父。遺笈不作鄧林投。

許演生次春浦韻見示因步韻答之

憶昔拏舟明聖遊。一天風月萬金求。尋花不避雲中犬。側笠都成雨後鳩。宦海東西同泛梗。人生憂樂在登樓。時演生住近光樓與君昆季相交處。膠漆之堅一再投。

上元後二日大雪次春浦同直韻

是誰乘夜襲昆侖。素甲如荼萬帳屯。鶴羽久留渾不辨。馬蹄才過已無痕。割鮮我輩尊方滿。待爨何人釜未溫。卻喜土膏能崛起。東風一為拔陳根。

復疊前韻答春浦

彌漫柏節與松根。綿續羅羅了不溫。祇恐乾坤填欲窄。卻教崖岸失其痕。春衣花集初成賦。用謝莊事貂帽人歸久撤屯。用王全斌事是日楊果勇侯入覲好向高樓縱文酒。當筵笑墮玉昆侖。是日同直四人。在近光樓小飲

漢生侍講用東坡聚星堂韻賦雪見示因次奉酬

疾風七日走雲葉。吹到天山萬重雪。欲填江海作平地。豈料橫空鳥道絕。小垣積覆何足數。老柏堅松亦三折。模糊那許稜角露。方便遂教鏡鑪滅。居人閉戶尙噤瘁。行者天涯正提挈。茫茫關塞胡可度。一夜冰淞錮眼纈。時親中有遺適者故云都無貂錦易麥飯。空把寒氈齧成屑。願乞羲和放日萼。化此沈陰只一瞥。誰家操篲茗方煮。有客對酒餅重說。羨君吟罷復登眺。凍後毛錐勁于鏃。

題郎海西畫馬

吾聞天馬不受絆。誰歟操此青絲韁。拂耳頓足三萬里。草頭一點西風長。絕其芻豆儻能走。世豈復有象龍手。玉鑲金鏤朱排沫。一戰功成骨先朽。伯樂不及支公癖。放與逍遙噉春碧。汗血全乾四蹄重。不使銀鞍覆虎脊。得無惡駕更齧膝。致令畫者三擲筆。畫者乃今曹將軍。能通馬語取馬神。飄飄尾鬣堆若雲。蓄怒未許奚官馴。猛士掣之力不均。祇恐繩絕飛且奔。海西所畫已難得。何況騏驎出西極。君不見騏驎出西極。又言在德不在力。

穆案此後數年侍郎奉母夫人諱在籍無詩

道光辛卯年十月三日。自秣陵買舟北上。王益之將軍。餞於石城門外。時梅伯言郎中。汪鄴樓上舍。許澹居鍊師。適相送。將軍邀共談讌。賦此寄益之將軍。兼柬伯言鄴樓澹居。

石城雨晝寒煙昏。壯士十人昇大樽。綠幘傳鞞羅炙燔。將軍華服來軒軒。我時艇繫青松根。三客送我紛

轡。我隨將軍駕短轡。三客先入纒裘門。郎中的是都官孫。羽客乃稱赤斧尊。汪倫話別殊消魂。黃馬之  
辨炙髹髡。有詩都向將軍論。斟雉在俎。莖以藜。釀榼在醞。盛於盆。談調醉呼墮崑崙。三客俱酬一客饑。時伯  
言病新愈。戒不飲。獨食粥。盡攪離思歸虛渾。憶曾高宴謝傅墩。將軍指聽青溪喧。謂與詩夢相吐吞。我道即是南塘園。  
牛山寺。即謝公墩。青溪一曲經此。寺久蕪。將軍兩世葺而新之。今春召飲於此。春月褪碧成秋痕。且復雁叫蘆花翻。將軍一歎驪歌敦。三客握手  
相覲覲。我乃浩吁白其原。昔也三釜逮親存。負米則勞意則溫。今也南望徒煩冤。有草莫報春暉恩。縱然  
天衢許小騫。湛露難甦襟背萱。況乃不材嗟液楠。羣友際此當贈言。無使數數不憚煩。用王良傳語。棹透泥兮  
統續繙。欲去不去雲水奔。何年再賦角弓反。記否白門烏榜村。盛哉此會其毋諼。

阻風幕府山下步楊子堅韻

憶昔石城艇子窮清遊。筍將直指白鷺洲。王郎放歌邀我飲醇酒。夢醒乃在江聲帆影之高樓。王郎謂竹嶼都轉。  
夏漲入戶雲浮浮。酒人畔散如風鷗。邇來輟道石城外。新寒噤瘁侵我木棉裘。打頭風裏人言愁。攝山之  
行勞夢秋。祇恐薜蒼石古經雨滑。況復三神離合波悠悠。楊風作詩散百憂。吐屬高雋神明逾。金焦一瞥  
便分袂。劃江不許幽人留。何如高唸米船且沿流。

雨盛不果遊燕子磯。次楊子堅韻。

江干青楓化爲霞。秋水以外皆春花。中有一磯挂林杪。道是銀漢飛來槎。樛突萬古礙星月。嘯呼六代爭  
龍蛇。峭壁垂雲幻錦繡。叢檣似戟紛杈杈。搖搖幢風佛倚閣。渺渺蘆雪鴻爲家。昔遊正值夏綠裏。時有好

鳥銜餘葩。今借詩仙蠟雙屐。謂子先喚漁父同杖擊。誰知冷雨鎖荒寂。三日都打迴風搗。涎涎燕尾不可見。攝山一角沈天涯。詩仙不到山不綠。得無象車不受誇。君乎琢句苔石破。我亦題竹風鳴斜。

新開河道中卽事示子堅

江擁頽沙沒舊蹊。風排積潦破芳畦。今秋蟹稻幾無種。來歲蠶麤不可齊。敗柳人支殘瓦爨。荒蘆鬼守亂棺啼。沈陰愁殺天邊雪。眼見單衣化井泥。

貂裘歎奇謝戴子宜郎中

貂裘遺自先大夫。先朝雨露膏且濡。問年兩倍晏子狐。似貉非貉烏不烏。然猶屢抗風霜麤。皮之不存毛附乎。我亦簪筆彤廷趨。疊拜宮錦紅流蘇。帝念近臣昔無襦。特賜豐貂殊麗都。歸喚細君莫辟纒。裁以金剪量以扶。亡何細君病且枯。無資可買南歸艫。乃懸其裘善價沽。有客斗角黃金歎。急送妻樵返舊墟。譬以此裘裹伊軀。伊念我寒夜或呼。我罔聞知淚映矐。後奉簡命涉雲湖。有友復贈貂襜褕。三拖受服古所吁。三反不受留其壺。仍然一鞞混虎踰。顛倒紫鳳拆海圖。後又拜恩賜諸于。謹獻北堂暄栗膚。連年衰素衣敗帑。鷓鴣典盡蒙茸無。一昨渡江將北驅。道逢心交憫我瘡。解衣衣我珍裘。外文內勁毛豐腴。慶雲彪炳晴虹紆。曾與上公龍卷俱。再拜三歎感黃墟。必值盛誼乃曳婁。馬卿詫好王恭盱。上朝玉皇翔天衢。下貰美酒亦時須。因思得裘何其劬。十年一鵝未溼喙。從今雪花不上鬚。都道握懷辟寒珠。遺簪墮履志莫渝。縕袍猶是當年吾。

雨盛不果遊攝山。答楊子堅。

有約不遊棲霞山。有酒不醉明僧宅。濫巾草堂已二稔。遍踏東阡與西陌。如何不登最高頂。一眺萬里江天碧。山中幽客屢招我。我欲被褐振金策。忽阻夏潦莽無路。遂令哀鴻滿其澤。啼餓聲苦佛鳴咽。洗盞人多烏狼籍。祇今黃霧鬱如夢。疑有嗷嗷首陽魄。大風吹帆不得泊。珠浪拍天才一白。神仙樓閣鑱雲表。紅葉徧山無鶴跡。曲碕小港涓涓去。但見扁舟盪詩伯。時子堅先泊棲霞港相候何妨他日看不足。已覺此行殊可惜。不圖鄭監流民狀。乃著靈運登山屐。

邗溝舟次寄別葆逸舟觀察。

觀察古君子。方寸特仁厚。世變能洞悉。否臧不挂口。敬慎了公事。瀟灑對心友。既戀山水際。復愛文字酒。托身雖朱門。不貴印如斗。襟抱似秋月。以虛受萬有。款款朱絲琴。豈落第二手。

于我有夙契。示我出肺肝。知我至委曲。爲我謀艱難。我劣聞道晚。君以國士看。深信遂移性。投藥亦獲安。月飲更詩飲。絮語到夜闌。忽然几席近。忽然海天寬。三日不相見。輒覺思覃覃。卽今遠別離。爭禁淚闌干。寒月照舵尾。江水日夜風。驚起雁失羣。擾擾蘆之叢。有客正懷舊。不昧聞霜鐘。歷歷遊宴跡。沈沈白雲封。何年更何地。嘉樹吟角弓。獨有五君詠。依然圖畫中。謂五客小集圖

寄別林方伯少穆

方伯揅荒富奇策。至今吳下稱仁賢。嘉聲隆隆徹天聽。凡有艱鉅君其先。斗維四郡水湧潰。江寧鎮江揚州淮安百

餘年來無此愆。帝咨寶臣汝速往。君乃猛駕金河船。君自河南方伯調江寧方伯乘黃河船駕麥豆並瀛脊同下。連檣麥豆載俱下。秋

汎方殼強弓弦。彥道倘伴咏米粳。梅妻慷慨輕濤淵。雲鴻有信萬民喜。窮鳥待哺千吭延。入境遑遑不暖

席。料民審戶籌金錢。手書疏草達當宁。絲言獎詡臚句傳。江南相定撫江北。江北謂揚淮兩郡。直躡東海尋桑田。

一夫失所聖懷歎。千里如見臣心端。詩書愈飽才愈壯。千辟萬灌成龍泉。洩官行法用剛斷。徇知恤舊仍

纏綿。每當案牘堆笏束。輒展書畫羅青氈。謂以古香散壅滯。神明濯後亭亭蓮。況復腕藏右軍鬼。定招判

乞張公顛。我渴憶君君憶我。十年不見殊欣然。鏡中鬢鬢各蒼艾。酒畔談議猶清圓。十年隔面會不十。我

其慢懶君臆胼。即從京口赴末口。備聞竹馬迎旬宣。君來弭節慰窮餓。全活奚止恆沙千。我別君後君不日亦赴揚淮一

帶辦災。盛名遷地定一轍。好事入手求萬全。我材瓠落不適用。三食奇字何能仙。況今乍失慈母教。瞿瞿以

後茫茫前。生逢堯舜不敢退。欲以孤介行其顯。箴砭吾過賴良友。自顧不見伊可憐。贈行已貸監河粟。結

意復授明珠篇。山水清遠難為別。且未暘開文酒筵。它時神馬儻相值。一笑先拍洪厓肩。記取石城兩漿

去。小春疎雨芙蓉天。

題林暘谷年丈餉鶴圖遺照

眸子激明骨相清。綺年文筆早知名。六經貫弗尤耽易。先生尤遠易理。繪取中孚子和聲。

海山清水自生肥。養得車輪玉雪衣。天下共知鴻鶴舉。謂少穆中丞。夢中親見鳳皇飛。中丞名號與孝穆有關係。

仙糧分罷劇蕭閒。看竹尋梅偶啓關。但看南飛不西笑。九重拈出六朝山。方中丞陳泉陝西時太翁不就養後乃蒙聖恩曲體升任江寧



大翁欣然就之

八十臞翁尙苦吟。雲車霓旆印仙心。人閒欲識林君復。合向江郎石畔尋。大翁望江郎石詩云。霓旆兮雲車。仙之人招余。竟絕筆于此。

菽水長留勝鼎鐘。翁句枯魚銜索感無窮。十年一樣孤兒淚。付與蘇耽叫朔風。澤與中丞先後銜。今皆鮮民。傷哉。

### 高郵湖卽事

甓社湖中弄明月。一彈指頃廿餘秋。憶廿年前。曾以扁舟過此湖。大珠已別孫莘老。小令空懷秦少游。紅葉打頭何處

樹。白鷗飛盡一扁舟。而今重憶任公釣。知有潛蛟伏巨湫。

撞破仙人碧玉壺。顛風一嘯萬家無。本年六月。中馬湖。灣決口數十丈。難將剩粟償饑雀。賴有長菱掇餓夫。時與工人夥。以工代振。

東海波臣眞蹇蹇。西山精衛亦劬劬。兩番毀擣春容過。始信回天聖德輒。今年春夏兩次。洪河異漲。水高一丈九尺餘。高堰幾決。幸西風

每發不過半刻。非聖德。餅幪。何能神異若是。

### 題張芥航河帥願遊第五圖天台觀瀑

吾聞治河青玉書。藏在珞岑珠岫雲煙閒。神禹拜後蒼夸還。會稽宛委祕已出。左顧尙有天台山。梯巖援

葛欲到不得到。但見飛流千丈倒。挂銀河灣。劉阮姁姁兒女顏。那識雲華妙用芙蓉冠。雲華夫人。佐禹治河。延州大

帥負俊氣。丹壺熟讀疑叢殘。心知碧林玉闕有緘蘊。足跡不履神其慳。願遊十圖浙得三。雲將拊脾雀躍

終盤桓。天姥之夢已飛度。少文有畫先臥看。吁嗟乎少文有畫先臥看。我亦傾倒與公一賦標霞丹。

### 題張芥航河帥願遊第十圖朝川倚杖

右丞畫筆照千古。以畫點綴成園林。況當山水清妙處。一鳥一松皆解音。功成身退儻得此。綠野平泉皆下矣。誰歟寄托出深意。關西詞伯張夫子。萬福威名草木知。主尊大勇東南毗。苦心久夢繡衣使。赤手能縛巫支祁。天顏左顧見砥柱。不到三槐不能去。久旅忘家禹所歎。見陶那得蕭閒咏芳樹。矧今蕪絕藍田莊。無地可起樓與堂。問君倚杖定何處。門前春水桃花黃。

邳州道中

十六年來此重過。石梁全圯水增波。樹如客鬢凋疎早。路似人心坎廩多。但使耕桑歡吠畝。不勞詞賦動關河。行蹤已踏天涯半。豈料羸驂困碾窩。

差馬行

王營雇車客欲擇馬。牙僧輒以肥應。三里涉鹽河。車以舟。馬則泐。僧以瘦馬泐而過。肥則匿之。主僕皆不知。卽駕以行。

書生苦路長。差馬願馬良。牙僧牽來果肥俊。四蹄踏鐵耳削刃。以車僇僇猛且迅。馬鳴蕭蕭。五鼓渡頭。載車以舟。解驂而泐。隔岸見馬影。匆匆駕車走。昨日馬如龍。今日馬如狗。主僕懵然皆不知。但覺馬鈍鞭絲遲。今日牡而黃。昨日牝而驪。吁嗟乎。孫陽相術流弊抑至此。驂駟甘受皮相死。

魚山二絕句

神弦各奏豔歌長。佳傳猶留鐵研香。西晉才人多似鮑。不知何事悅絃郎。

東漢金隄惠最深。武皇英異亦驚心。此山平後功難已。惆悵秋風直到今。

過腰站有感

廿年清議一身持。四海賢才到耳知。叔子去人真遠甚。房公食鮓最凄其。燦金安用羣兒謗。投杼終教阿母疑。識到白雞諸事了。有誰箠響激桓伊。

富莊驛盜警

交河有驛名富莊。市廛閭咽衢街長。使臣軺車旅羸綱。風宵雨晝行洋洋。客舍十漿饋五漿。竹肉靡聲燈燭光。犬吠不驚雞不荒。行者指稱安樂鄉。不知誰何齎盜糧。盜匿其室登其牀。夜出剽剝刀如霜。十五五手戟槍捷若飛鳥來屋梁。束縛壯健揮羸尪。恣斂金帛肘篋囊。開門大笑各詡強。才隳西鄰又東廂。旅人駭鋒跪獻裝。居人糾徒相守望。我夢驚覺心傍徨。但聞火器雷碎破。都知錄事紛踞牆。各握利刃聲高揚。儼如登陴爭堵防。盜殊閒暇行翺翔。投閒抵隙仍相嘗。倡盜東矣西攘攘。倡盜西矣東皇皇。人聲稍微盜語唐。盜何悍勇人何恆。孰主宰是使猖狂。我求其故不可詳。牛缺大儒且被狀。王鐸盡室皆喪亡。吁可畏哉。遇迷陽。迷陽幸勿傷吾行。况當世平年豐穰。青天白日鼠跳踉。錦衾肉食狸奴藏。是誰之咎當評量。

憶昔

憶昔最高樓。溫簾夜上鉤。清談數郡桂。佳句鬪應劉。老父歸何遽。羣賢歎不休。惟餘起草石。常共綠苔留。

乾隆朝先君直向書房。寓近光樓。乙卯之冬。先君視學山左。隨即歸道山。同直羣賢。歎息不已。

憶昔樂泉西。高荷拂馬蹄。板輿花底卸。紗幔水邊齊。賜果親先拜。分甘幼共攜。那堪春夜月。來聽哺鳥啼。  
道光戊子之秋。澤奉命直南齋。寓樂泉西坊。時先慈尚健。就養來園。輒令思之。如同隔世。

憶昔老涪翁。詩壇表大風。人如秋水白。天與夕陽紅。自詡千言得。何曾五技窮。靈光吾亦仰。絲竹擁江東。

憶左田師。

憶昔墨痕蒼。雲崖十載強。新詩閔鄒魯。古賦動侯王。桃實成三竊。梅花醉幾場。不龜如可錄。願獻百金方。  
澤自癸未春。與祁春浦庶子同直澄懷園。賦詩至多。時左田師常和之。又元夕賜觀燈。命作賦。澤以古賦獻。時賢稱之。計戊子之秋。王辰之春。凡三直澄懷矣。

吾同年友沈栗仲。取炎陵旁梓為琴。以予好談琴理。以為雅似。因舉一贈焉。予學之三月。不成聲。將輟。乃漫謂栗仲曰。琴理予已得。雖不能操縵。何傷。栗仲曰。凡精微必始于器數。今舍器數。究精微。譬若舍實踐。談性命。禪門所競。儒門所呵也。曷囊琴以待知者。我籥庭先生能彈而無琴。我蓄琴而不能彈。因舉以轉贈。以還栗仲之約。于其行。以詩媵之。

炎陵之梓西瀾弦。其聲來自秋雲顛。秋月泊水水泊天。十指以外皆流泉。沈侯鼓琴得琴理。不在弦聲不在指。夜深危坐盡一卷。其味醞醞與琴似。無成與虧彈不成。我欲虛盜淵明聲。沈侯輕笑姑舍是。不入器數焉。識器數精。大弦琅琅老鶴鳴。細弦啞啞雞鶴清。似斷似續似欲罷不得罷。魂夢已壓江湖行。此時無聲有太息。天外鳳皇當戶立。香鑪茗椀俱靜好。翠竹紅梅各顏色。我友能彈不輕彈。神理悉與琴相關。太虛惟漠惟澹泊。下視人世殊鹹酸。手脩太平潤鴻業。只在殿角薰風閒。快雪封條拭琴漆。送琴出門杲杲

日思君重話寥天一。

醜女

井里有醜女。七竅俱不正。工藏自塞兌。媒灼不許偵。日行蒙霧羅。夜坐背燈檠。賦命不窮薄。遂得兼金聘。其智昏菽麥。焉能庇家政。萬人所吐弃。野宿不先行。以茲結歡心。謂秉貞介性。狎習日既久。不以貌為病。寸良未盡味。自照怒擲鏡。如何天壤閒。容有面首倩。寧使血嗣絕。不令姬媵并。睽睽十目視。一手眼弗竟。但解判黑白。難免動嘲評。旦夕歡意改。姚冶鬪華盛。百惡盡顯暴。厭斥等梟獍。長歎愧其侶。投身入深窞。

果子狸謝祝衛畦同年

百果精華化玉膚。千狐文采作襜褕。深憐諸葛蔑鈎輅。堪歎張蒼肥瓠壺。瓦甑松薪差免俗。牛刀龜手故嫌麤。昨宵夢到秋山裏。梨栗成行兩兩呼。

初春澄懷園酬春浦兄見東元韻

眼昏校字隔甚霧。丹黃一錯六州鑄。時有凍雀覘新戶。側聞尊師此小住。百年慨人十年樹。聞松亭師在  
此小住師前

春浦復倒疊前韻見東又和

君才洋洋海東注。猶復戀此蟾諸願。我憐捷逕徒窘步。夢裏梅花三百樹。兩番結鄰桑下住。夜看星辰共開戶。有鏡須向江心鑄。照徹寒天十重霧。

春浦三疊前韻見東又和

殿前走馬拂花霧。人道子昂無可鑄。獨抱明月掩朱戶。便欲回山作長住。誰知上林借一樹。天路漫漫此  
鵝步。君到要津莫回顧。河酌忠信須挹注。

春浦四疊前韻見東又和

此閒大隱如隱霧。奚必躍冶求金鑄。奇卉映圃書當戶。君心妙靈無所住。飄然文鳳集溫樹。新詩捷敏止  
五步。入門大笑君來顧。招我駐聽精牀注。君飲酒溫克。喜招人管轄。

挈眷定居藤花老屋

銀河左界雙栖處。三面披光帶茂林。馴鹿過山知草馥。流鶯啼雨覺花深。暑天破睡卿能繪。遠道衝泥我  
獨吟。記取歸來柏冬日。枳籬藤蔓總成陰。

和祁春浦兄望雨詩韻

膠水萍殊澀。穿衣絮尙狂。雷爲風奪響。雨讓露專涼。但曝竿頭麥。須舂石上梁。南天尤待澤。收涕攝羸尪。  
未到呼號際。先祈黑輓祠。農情隨地改。聖敬有天知。卜坎將盈缶。占雲已蔭著。應成洗兵兆。早晚待紅旗。  
奉賀春浦五兄。由右庶子。擢翰林學士。

虞戈流電笑。柳筆動天心。豈但飛騰速。方期契合深。清神兼卓識。密緒發高吟。話到經綸際。遺編耿獨尋。  
主聖酬知易。親嚴養志難。趨公無過舉。退食有餘歡。永日君羹美。晴空鳳羽寬。惟憐老秃筆。偏戴遠遊冠。

答叔穎兄。謝石首魚詩意。即用原韻。

江鄉曾小住。風味逼春來。尺鮪騰浮玉。珍鮭聚大雷。白傾鮫客淚。紅奪美人腮。石首持相比。翻成蝨蠅才。此品津門貴。家家倒酒罍。須知吳國鯨。能勝陸源鯖。白石何妨煮。青蕪可佐烹。未招鄰父飲。聊獻小人羹。

偶成

百鳩齊喚雨。一鵲獨呼澌。天意殊無定。雲心未可彈。柳柔風抑抑。荷正露團團。敗我觀魚興。危磯倚釣竿。

古意

霧凜復霧凜。農人覆鉢甕。木稼復木稼。達官聞之怕。達官畏死畏失職。求爲農夫不可得。農夫歲歲求豐年。達官夜夜求神僊。

西鄰東祁春浦

三日琢出琉璃天。導我遊者水鳥先。詩廊步詩倚一椽。夕照送到西鄰煙。先生我西鄰也與君卜鄰凡兩遷。水容山態都依然。只有霜雪侵吾顛。登臨惆悵私自憐。梅李桃杏年復年。身非金石何能堅。但思善閉遺鉤鍵。肯以豨膏運方穿。昔也往蹇今來連。東風畫空晴日妍。寶釵樓上通侯眠。何如吾儕岸牽船。面面見水窗窗圓。與君夏約寄浦蓮。恐君仗節惟則褻。獨我守此鯢桓淵。看取魚戲青田田。君詩三復馨若荃。華不繁緝巧不儼。郊居一賦君其傳。

過連口

犬性不吠日。嗾者職其咎。屢奪犬食。食犬急乃狂吼。訐告及誘民。憑仗吏爲剖。右民而左犬。犬怒積益厚。食飲不外索。刀劍恆在手。惟鹽惟硝磺。非儲不能有。聞已數年辦。欲備一旦蹂。胡爲典牧者。蒙耳且杜口。威信在平日。不在臨事時。機宜在頃刻。不在衆寡爲。始雖墜成池。終能奮澠溜。或冀寬大恩。不責遷延師。猛性慣仇殺。必有人與里。其人既可竄。其里亦可徙。人里俱不見。仇殺奚自起。通言必開諜。開諜卽姦宄。果冑爲我用。虛實易知彼。宜戰或宜撫。此閒有妙理。自古失機事。孟進與畏。陽明平涇頭。計禽池仲容。及受桶岡降。幾敗瑣匙籠。神威攝其膽。行兵疾于風。向欲還詐力。萬死希一功。使不謀略周。反被蠹賊虹。所以斬諸生。大藤推韓雍。

有感

美人一笑千花紅。眼波流入人影中。人人衣上生春風。夫君裹我錦繡叢。嗔呵警咳都避儂。忍一彈指傷芙蓉。誰知此志能當熊。昨日上塔帚帶結。今日登樓鳳釵折。何日相逢訴鳴咽。

雪宴西北樓 酬祁春浦 吳淪齋 兩同直

雪宴西北樓。春色來大荒。是日將軍歸。說劍飛星芒。彈指四年餘。鴻濛別雲將。今日喜搏沙。苦祝無分張。西屋臥土龍。東家接王陽。咫尺地迷界。闌闌天際祥。瑤岫排玉林。銀漢連紅牆。賦餅招詩豪。脫裘酬酒狂。旣呼祁孔賓。復憶斛律光。吳子闐然至。談笑同藜牀。畫出激懷圖。何如負氏莊。

吳仲容選詩圖



吳君行政若琢句。果力精心不旁鶩。吳君選句若選才。廣甄約取能別裁。翰林主人賢太守。永叔荷花柳州柳。九重溫語慰循良。萬室弦歌動星斗。簿書如山磨不磷。玉壺秋水凝吾神。三生結習愛佳什。批風判月書白雲。書堂夜靜高呼嘯。都是越儂莊烏調。一家選手續丹黃。十萬詩魂向君笑。人誇浙派君不謬。人嘗浙派君不憑。破除門戶還風雅。知君是有心秤者。

春圃五兄以鵝脂見嗽。先有詩來。此答原韻。

羽毛脫盡空留翠。何處書生可寄籠。黑白我無苻朗辨。咨嗟君有右軍風。聽經聲寂萱騰睡。卻月胷垂自在豐。如此看烝良不惡。於陵絕倒出哇翁。

大隄

大隄坦且夸。絲楊翼成帷。前有蒲輪車。後有黃金羈。花天逐隊行。夜月無聲馳。問誰實築此。前人好爲之。連朝剝猛雨。積潦東西歧。淺者生白窠。深者化污池。問誰實修此。袖手無人尸。吾恐弄弗顧。遂壞不可支。苟有荷畝者。當往助其疲。

澹水放舟六十里至濠港作

復潦潼激涂軌壞。板橋映空去如芥。騰波欲躍馬足汰。亭長搖手館人戒。曷不乘舸下澎湃。惟予素慕五色滄。一棹闌入琉璃界。水荳風裏白鷗外。飛墮遙天一峯臙。愁霖廿日宇宙晦。安得殷紅夕陽曬。可憐篙底豆田大。白梁雖成未卽艾。去年水厄感凋瘵。冀今秋熟乃償貸。旅人三祝水速退。誰知鬱雲漸破碎。烏

有晴聲松有籟。卻歎湖船卑且隘。人坐匱底仰啓蓋。良朋促膝話儕輩。喜其遲放惜其快。忽聞騶從聒叢蒼。昇者紛紛促行旆。回顧帆影失前瀨。拋簑又走泥塗內。

傾城

傾城一笑玉無瑕。慣作新妝惱孟家。纏帛纖纖輕采鳳。翹鬢楚楚幻靈蛇。但教翡翠娛蘭畹。莫使蟾蜍蝕桂華。一樣笙歌明月夜。南樓蕭寂北樓譁。

廬州吟

廬州淮以南第二重鎮也。其地博大爽塏。有山不當孔道。有湖越在偏隅。是人事必爭之地。而非天險不可度之地。自來兵家談阨塞。往往以廬爲天險。非未曾目驗。卽相承剿說耳。作此正之。有山不當孔道。阨有水越在東南隅。北來不及濠若壽。南走僅恃桐與舒。頻嗟千騎飛入境。復恐萬艘直擣湖。自是戰地非守地。以戰則克守則恐。

壬辰五月十七日。臣恩澤典試廣東。時方需次。未與考差。出自特恩。感而成賦。

方慙東郭未吹竽。誰料商邱竟索珠。一釣六鼈憐力薄。十年二賦果心劬。山中玉葉諸生泣。爨下桐焦聖主吁。試讀遺賢新詔語。吾儕何以答唐虞。

易京懷古

京憑如礪築崔巍。女使傳宣鐵戶開。忽見梯衝天上舞。不知樓櫓地中灰。謀身那及田疇固。剗險須教石

虎來既讀兵書還避世。癡兒徒抱自焚材。

易水懷古

有勇不能神。擊刺非所詳。吾恐魯句踐。不過秦武陽。既稟神勇資。擊刺必其善。吾恐百鹿盧。不敵一句踐。藥囊提匕首。一足廢鹿盧。誰謂老荆卿。翻困夏無且。將軍已冤死。督亢安可復。何如高漸離。從容一錫筑。

苦旱

三月京畿一雨艱。陂塘成徑井泉乾。庀風卓午蒸炊熱。重露深宵噤啞寒。海畔乖龍呼不起。潢中女魃怒相干。祇今處處皆祈禱。活我官羊不忍餐。京南一帶亦旱。因屬地方官斷屠。使者亦斥絕肉食矣。

河閒道中

杜癖與和癖。於人了不同。賢王聚書富。姪女數錢工。靜日管弦語。寒宵剽掠風。我曾逢盜跖。幾爲舊託窮。去冬富莊驛盜警。通夕不寐。

素食

家貧不能辦素食。食鮭乃有二十七。爛蒸鵝鴨是瓠壺。拆煮牀簀爲花豬。生耳唐園負此腹。每喚周妻罷何肉。況當炎暑騰騰蠅蝻集。縱有侯鯖亦當覆。畿甸以南數百里。土渴風澇井無水。已聞解禱動閭閻。應使腥臊斷刀凡。吁嗟乎。使者既無段公術。又無束生香。坐致甘澍隨車箱。乃率徒衆飽此大官羊。方丈一箸干陰陽。何如飲水作齋保。吾素自啓筠籠放雙兔。

東阿道中

陶邱荷澤都無涉。賸有安山一道清。七十二泉連鈞突。伏流何處不分明。

舊縣

穀城古且秀。面面好山遮。立土墉千雉。清陰蓋九葩。車行深巷觸。馬踏亂流斜。猶說檀公壘。虛糧斛萬沙。

阿膠

涉南名士水。天外鳳皇膠。古有生金用。今爲敗鼓消。傾囊殊黯黯。款戶故喧嘩。安得書三券。來占鼎六爻。

東平州

節度天平古鄆州。中都亢父望中收。西馳宋汴無關隘。南下淮徐等置郵。鸞尾山前雲似夢。虎頭崖畔雨成秋。我來一洗呼號耳。入山東界。而甚調。鬱鬱長桐已沒牛。

汶上道中

俯入一村綠。倒涵雙沼清。燕披松雨屑。鵝助葦風聲。瑩石新場圃。豐碑古姓名。遙憐牽挽處。五復正縱橫。  
開河水少。牽挽不易。

途中有以姓名不見朝籍爲問者。作此解嘲。

露坐占星客有疑。異哉象罔竟何之。百官表上公亡是。八月槎頭某在斯。敢署玉皇香案吏。應吟賈客木棉詩。豈知僕僕羣僚底。寒暑都無沐沐時。

魯道

嶽雲樓畔館花妍。說水橋邊墨刻鮮。胡祿獻漿才一面。林宗埽地又經年。昨冬過此綠陰深巷。畫爭果。夕照高。原馬急泉。猶憶計偕奔走日。柴車茅舍雨如烟。

彭城

山環如缺水如弛。繫馬臺邊儼望思。孝伯語言張暢答。佛狸風采寄奴窺。江淮遠帶眞屏幃。楚漢交爭古奕棋。不道昇平全盛日。隄防黃汎抵雄師。

從來治劇用蒲鞭。坐使清風滿市廛。捍水大蘇通上策。馴兵敬德握雄權。卽今城角交流處。終古樓頭兩賦懸。我欲輕舟看飛沫。了無忠信涉濤淵。謂呂璣洪

宿褚莊作宿州所轄驛

辛巳五月杪。奉命使西蜀。初握衡校枋。且喜且畏縮。退食告慈母。慈母歡意足。屈指不十日。便欲膏棘軸。呼兒整書筴。飭婦理箱篋。婦亦粲啓齒。扶病爲檢束。強起頭涔涔。并行足踳踳。俯歎病漸深。仰歎我行速。血敗內風發。歐噦幾絕粟。帶孔日以減。消到臂上肉。我時迫事冗。千緒擾心曲。偷暇議方藥。醫屢已滿屋。眞元浸虧損。葦苴豈能復。母亦知疾革。私冀鬼神福。對母我伴笑。背母我潛哭。茹苦二十載。痾痛相育鞠。一旦小騰蕩。毒之若轉轂。卿患自易瘳。我訣胡太酷。卿言初奉使。無令簡書促。我病儻不起。來世再相逐。卻嗟堂上母。何以慰幽獨。怪哉造化弄。病者漸清淑。神斂形復振。食飲能到腹。其目六月八。車脂馬翹陸。

其時雨如注。病者臥甚熱。三喚不一應。一別兩黃鵠。閱十有七日。我出井陘谷。夜夢尪羸妻。握手話顰蹙。似屬慈母老。鸞膠必當續。我覺淚霑臆。卿豈返仙錄。誰料卽諱日。從此奠羹粥。彈指十二載。封軺又南服。六月十七日。我在褚莊宿。振觸昔年事。淚若雨瀉竹。人生情難割。死與別相屬。忍死不惜別。其意殊慘毒。死究不可忍。別亦莽難錄。年來心力憊。實爲感風木。老母健存日。事事可欣祝。今母棄兒去。如夜失其燭。不敢負所學。焉敢覆公餗。上思酬聖恩。下欲被邦族。尤當薦賢哲。以備荒歲穀。區區兒女懷。擾擾風中麈。用韓句曉月吠村犬。暑幄舞檐蝠。僕夫起芻秣。明日又山麓。

愁滂

去歲瘡痍猶未復。今年穡事可憐生。眼看嘉穀高低熟。心折愁霖日夜傾。三伏赫曦蛙叫斷。一天秋思鷓啼成。不應空際江河注。似有蛟龍鬱怒聲。

旅困

泥行無輜水無舟。一任肩輿莽泳沔。欲逐東游雲將速。翻成西域買胡留。公程刻日奚能緩。凍雨懸河且未休。最是漏痕催客起。三更不職卷衾裯。

旅愁

僂民昔行役。慈母虔祝天。飄風暴雨會有時。無使子季逢其遘。母祝甫出口。兒千里外身安便。兒今行役無母祝。舟困於水車困陸。困極呼母母不復。深恐迷陽刺吾足。吁嗟乎。豈無妻孥祝紛紛。不如吾母一語。

神。

渡淮卽事

汝穎沙渦競短長。還收睢滄五文章。遂磨洪澤而東鏡。似築深江以外牆。天際數峯眉嫵翠。中流一畫墨痕蒼。卽看歌舞雄都會。何處風雲古戰場。

臨淮曉發

糝地輕黃沙似雪。蔽天濃綠柳如帷。畫橋東岸空明水。多少英雄照鬢絲。

途中有懷邢氏園寄醴泉竹心兩上舍

表裏皆秋水。廊西復榭東。竹閒鐙火碧。花外月輪紅。枕簟通魚夢。茶瓜付柳風。尤憐老昆仲。清絕讀書窮。愛畫迂尤妙。能詩麗乃才。三秋率爾會。二仲闐然來。謂狄愷垣。楊子堅。眺遠連移斂。談幽密室開。時聞笙鶴響。西

畔卽蓬萊。西畔卽朝天宮。

十園秋影窳。水華。一院古香多。老桂。人語穿楊柳。樓陰壓芰荷。塗雅翻贖墨。繡佛卷輕羅。予常作書。婦繡佛。最愛新黃

月。全家俯夕波。

文讌推車輩。華堂雪爪痕。好花園竹肉。嘉樹覆兒孫。媿我依鴻廡。予去此園時榜其事曰質春。攜家隱鹿門。主情深似

海。三歎卻離尊。

溽暑愁霖際。封軺晝夜馳。壞垣無可館。唾井亦須卮。馬首多鄉夢。烏巢感故枝。何時酩酊醉。重造習家池。

所見

土阜相望五里餘。劇驂午午樹疏疏。羸綱月壓柔紈候。帆布風隨大木車。井幕有人喧甕盎。戍樓無卒裹  
籩簞。可憐茅舍明才啟。已有村童朗誦書。

合肥城外別家三弟惠浦

金斗城邊路。先人有舊蹊。

先大夫少時依合肥令張菴圃先生讀書縣衙

聯牀非意料。騎馬又分攜。恩戴三山重。文愁五色迷。歸

途傾菊酒。重聽汝南雞。

有饋生鵝者。積至五。不忍殺。撒棘後。送海幢寺養之。作詩贖其行。

舒雁腴於食稻鼻。庖丁厲刃正相呼。定知不殺非無謂。留與人閒逐短狐。

聞道禪關闢大千。浩然生氣貫南天。依稀曇曠村邊路。一盞清齋五夢圓。

雲飛水宿恣長鳴。豈料來支鎖院更。此去聽經還聽講。好脩來世作書生。

石華勉士兩學博。擊紫洞庭。追送於海珠寺畔。設飲談至三更許乃別。

海珠石上攤星飯。愛此南溟未易才。一見渾如舊相識。二年前已夢飛來。予主席鍾山。忽一夕夢游海珠寺。文章遇悟頻

看劍。翰墨緣深。數舉杯。良夜三更風露白。尙疑身在越王臺。謂前此看月之舉。

姊妹花

順德縣女子。往往不嫁。聯三五姊妹。行樂自如。雖髮白。猶處子也。



姊妹桃根。妹桃葉。東里西鄰采香妾。聯成一氣同心花。三十四無夫家。不徹環瑱亦不嫁。鳩媒造請必遭罵。每當秋月春花天。踏歌聯臂來闌闌。拾翠嬌慵大隄上。彈棋放誕雲屏前。陌郎相戒不敢顧。恐受指爪空中鞭。翻嘲陌郎馬如狗。閉置車中作新婦。參軍鍾氏詎能遇。道蘊王郎隨地有。君不見六女竈下養。三妹青溪姑。五家合隊如貫珠。一雙擁背同瓠壺。修到果州寒女謝。自有雲中鸞鳳逐。

舟過泰和喜晤攝令張南山同年。邀登快閣。歸飲於衙齋。別後得詩四首奉寄。

十年睽張侯。一笑登快閣。渾忘別甚速。且述相見樂。出處憂患際。耿不廢著作。必逢斲聖質。急告不待索。長筵爛漫興。良夜深踐酌。莊語閒諧語。思之恍如昨。續歡在今日。今日日又落。下有東逝水。上有西飛鶴。海南五色羽。縛爲君子筆。如何署紙尾。祇合畫雲日。不讀城旦書。焉知堯舜術。君相識其循。楚滂無忘逸。君任黃梅時辦水災極妥善 小試步文節。江月照萬室。快閣六百載。魚鳥又聳乳。卻顧名山藏。著書比於櫛。高賢羅滿堂。夢寐拜甲乙。君輯國朝詩人徵略先成六十卷

長年狎驚濤。厥舵不在手。卻使制奔馬。馬亦馴不走。才高百適用。慎勿掣其肘。用小不若大。用新不若久。赫赫未一舉。斷斷已眾口。毋被宵小測。必照罔兩醜。千譽定無譽。含垢實濯垢。古大有爲者。敝屣視印綬。初筵劇快意。談論出肺腑。燭至促客行。沙水舟漫漫。一夕償十年。求友亦大難。狷性尠心計。勢交多面歡。況乃道藪契。植根天地寬。神劍飛合時。重取焦琴彈。

機女

天孫彩付九張機。手爪纖纖任意爲。左顧鴛鴦裁錦捷。南飛孔雀織縑遲。當窗恆斂千金笑。掩卷羞看十索詞。何事樓頭聞太息。昨宵弦管嫁妖姬。

市娥

彈箏跼屣上高堂。墮馬鳴彈鬪異妝。水畔洛神留后羿。圖中天姆教羲皇。媚人嶺表收奇藥。獻客江南解玉璫。卻笑西鄰蓬鬢女。五更寒月照流黃。

過桐城憶羅子銘詩以代柬

憶我天真友。披猖老未休。有書娛寢饋。無路取公侯。性厚肺肝熱。言迂枝葉稠。鹽車嗟力瘁。猶爲百暨留。衛虎顏如璧。袁羊氣似虹。阿遵年少日。醇酒婦人中。博雅恆驚座。疏狂慣惱公。邇來消滅盡。久旅一鐙風。  
九日登高會。三年一瞬過。君前年訪我於鍾山書院。時值重九。登翠微亭一敘。舊琴幾欲尅。新劍喜重磨。鹿起遭逢易。桐城爲往來孔道。君在樅陽。距桐城不遠。鳩茲問訊譌。時君往蘇湖。鯉魚才網得。珍重寄江波。

南海求珠去。嘗騰昧夜光。旅愁店且疥。予去時病疥。歸途病疥。故態醒而狂。明月懷元度。闌風感孝章。何年更何地。重話打毬場。

重陰

沈陰不散地埋憂。冷雨三旬苦未休。幸不侵陵農事晚。已難消受旅人愁。蘆花溼處哀鴻泣。蕉炬炎時凍雀投。卻詫北風如虎怒。盡吹清淚落南州。

夜聞鬼車啼有感一友

天畔笙簧旋其聲清且圓。方士聞之喜欲顛。云有仙樂迎吾前。九首復九尾。厥狀怪且詭。兒童聞之捩犬耳。云有黑祥將降矣。徵諸古童謠。鶴兮更鵠兮。久雨必西驚。久晴必東栖。載鬼盈一車。其說無所稽。徒以八音繁會十脰奇。耳目之內紛見疑。如何尙作摩雲嬉。勸爾潛形伏海壘。無使吐哺相公惹妖鳥。

木冰

乾雪不封條。溼雪常裹樹。冰淞散作千林花。寒氣蒸成百里霧。日出團團雞子黃。重雲渲染素月光。遠人遠馬一瞥過。如夢如影空中颺。吁嗟乎。三旬冷雨茆檐凍。薪米都無腹空洞。憑仗來年覆飯甕。

過臨淮關喜晤風陽令廖君達名大聞

我獻鳩車始君登虎榜初。君爲先大夫王子科典試所取士時余方八歲卅年慳把晤。一見重踟躇。俊鶻盤拏健。文珠表裏虛。循聲符衛颯。英斷奪裴諧。尙困仇香棘。誰題仲舉輿。老成多策畫。清望謝吹嘘。使者歡傾蓋。高明笑執祛。燭筵紅爛漫。雪徑白開除。民瘼如飢己。雄談實啓予。恭聞九折臂。勝讀十年書。逝矣師生際。傷哉父母且。後堂彭子佩。高業魯君魚。感舊烏烏笛。懷歸得得驢。求珠曾嶺海。弭節又淮徐。積潦前乘輻。荒流此杖桴。六過此大水。頃水更大。須乘舟由淮入沫口。情深盟古井。別速指蘆廬。黃海思招隱。桐鄉已卜居。君有惠政於桐城因卜居焉歸耕吾願果。相約帶經鋤。

定遠道中遇雪

木落淮南雪已來。平原一尺豆稽灰。混茫雲欲排山至。料峭風能勒馬回。莫歎荊櫓薪似桂。且看金井麝如堆。征衣溼盡渾難理。自擁寒爐啖芋魁。

過舒城喜晤曾望川同年爲題尋春小照

雪中羸騎暑中鞭。孤負尋春爛漫天。誰似能詩曾子固。眠花躡柳十餘年。望川歸田已久。  
七旬風骨尙清翹。燕玉周妻兩寂寥。自是人閒仙鶴下。不知世有阿龍超。  
老圃秋容擁軸邁。一尊相對快如何。往來數數吾能事。只恐王良負友多。

淮漲

淮肥交漲澤陂連。一碧混茫直到天。翦翦鷺行風外絮。團團雅點樹頭煙。梁稽鹽立魚鰕聚。柳頂平髡荇藻纏。莫詫天寒波不縮。洪湖近欲塞爲田。

河決決於人也。有陳端者。潁河田數成。夜集千人舉而河遂決。

有人夜半決金隄。坐使黃流改舊谿。河伯已眠驚欲死。愚公此舉太無稽。誰能糾合千夫舌。只爲膏腴六斗泥。壞我濯龍淵欲盡。長淮東注溢而西。

淮漲

君不見浮山作堰遏淮水。鎔鐵欲鑄蛟龍門。一朝浪破上下格。東數百里雷霆奔。胎簪之水性慳悍。其力能刷金河渾。重防疊障苦束縛。有若熊虎羈其蹻。誰歟口腹能吐吞。龜山下有洪湖屯。近因轉漕用屨灌。

匯黃舊路幾無存。宜其高堰歲欲潰。億萬命懸消長痕。泥沙日塞湖日督。偪仄已到鮠桓潘。今秋黃決入湖去。河伯欲與支祁言。上游潦積等溟渤。以舟闖入蘆花藩。窮一晝夜甫達岸。云此卑淺無足論。中流卻顧渺瀰處。翦翦尙露黃梁根。老漁遠近布置網。農父逃竄攜兒孫。側聞激流埽濁昏。昔何如蓋今如盆。轉禍爲福悉天幸。聖德廣覆流仁恩。重臣新奏治河策。星使絡繹窮根源。疇看黃順淮亦順。水歸其壑稼被原。蠙珠可佩魚可殮。不須春漲愁昆侖。

海鶴

海鶴排雲矯不羣。其聲一一上清聞。常嗟隨陸不能武。莫效王文揚空屬。醉後短衣堪射虎。時來羽扇亦揮軍。清談隊裏排矛戟。鐵馬叢中說典墳。

北沙河

寒山碧於雲。朵朵落平地。清流帶沙渚。冰雪結其裔。馬蹄波離風。人影鏡面字。稍稍涉坡陀。悠悠緩征轡。忽見西歸雅。萬墨溼空翠。枯柳抱村紅。中有夕照醉。

所見

奇肱之車渥洼馬。羽林孤兒飲飛者。黃塵合處夕陽下。一隊鷹鷂落平野。弓如霹靂刀如風。舉刀一割百里紅。草閒孤兔那足射。欲斬六鼉滄海東。澹臺古冶能屠龍。壯夫豈畏波濤洶。勸君痛飲荔支酒。睡過重洋莫回首。

旅壁有題曰秋蝶夢春花。惜詩未佳。作此和之。

依舊好樓臺。繁紅寂不開。舞衣休再著。團扇苦相猜。花月三生忤。風霜兩翼摧。昨宵曾夢見。歌管送春來。

何堪

泔水仍飢已不支。何堪風鶴益危疑。盲來差幸駒生犢。嘯能深憐馬踐葵。荆棘旅生何術剪。珠犀夜饋有天知。听听多狗昏昏獵。絕倒支離攘臂時。

